



續古文苑

六

和16
1200
64





續古文苑卷第十八

賜進士及第授通奉大夫山東通省督糧道加三級孫星衍撰

碑志四

一 大唐朝散大夫行潤州句容縣令岑君德政碑

唐張景毓

蓋聞諸易曰有天地然後有萬物有萬物然後有君臣有君臣然後有上下然則星辰為緯丘陵山險所以經啓八紘彌綸萬域者也聲明文物禮樂詩書所以黼藻生靈化成邦國者也至於高居萬乘富有四海為而不宰裁成於孕育之先感而遂通囊括於混元之首雖柔來剛往乾坤之軌躅可尋而步帝馳王

雲火之深塵不昧則疇咨四岳允釐百工大則鶴鼎
魚璜錫寵於機衡之地小則緇幡墨綬守位於子男
之國其有相門紉緒王佐推才負揭仁義周旋禮節
排九流而迴出掩三異而孤昇緝諧毗吏綬和風俗
堂上堂下驅密賤於後塵星出星入置馬期於散地
閒而以肅嚴而不殘馳心於廊廟之前口迹于江湖
之上者獨在于岑君乎君名植字德茂南陽棘陽人
也其先出自顓頊氏后稷之後周文王母弟輝剋定
殷墟封爲岑子今梁國岑亭卽其地也因以爲姓代
居南陽之棘陽十三代孫善方隨梁宣帝西上因官
投迹寓居於荊州焉自軒階垂祉姜洵開宗神岳構

其嵯巘靈根肇其枝葉其在佐帝師王封侯尚主十
卿五公之貴七珥三組之榮衣冠燭耀於區寓允緒
綿聯於載籍亦由秦移趙璧魏得隋珠不常厥地所
在稱寶何止梁亭漢室先開佐命之封吳郡荆門晚
蒼因居之地若斯而已哉高祖善方梁驃騎大將軍
周起部尚書開府儀同三司長靈縣開國公食邑一
千二百戶贈侍中諡曰敬當萬機之損益成八座之
儀表銀艾圭茅金鏘玉振榮高當代龍豹之託逾深
寵茂幽局鵷鷺之寄斯重曾祖之爲隋虞部員外侍
郎襲爵長靈公霞騫電邁鳳彩龍光初膺星爲之榮
晚襲山河之寵祖文本皇朝中書令兼太子賓客宏

文館學士江陵縣開國伯食邑四百戶贈侍中謚曰
惠宏材巨量經文緯武高標百尋絕壁千仞丹青神
化翊亮天工卽隆周之申甫亦皇軒之風力若乃百
揆務殷三階事切西朝機要之所北閣神仙之地任
摠訐謨榮高密勿至於五車萬卷百家諸子吐鳳懷
蛟凌雲槩日不尚浮綺尤存典裁藻翰之美今古絕
倫父景倩周大中大夫行麟臺著作郎兼文館學
士縮青襟而司禮館草元經而登書閣聲榮之重驛
美於當朝燕翼之寄傳徽於後烈君紫泉飛液丹山
耀彩孤峯懸日月之輝激溜聚烟雲之氣虚心倘儻
靈鶴再舉而未窮逸調從橫大鵬六月而方息生而

好學幼而知禮孝行無待於傍授仁心得之於自然
黃憲之類顏回汝南爲貴賀循之擬龔勝江東擅名
不學左思十年爲賦聊同方朔三冬讀書不出戶庭
旣馳心於萬里將排雲日亦因基於一匱弱冠以簪
纓貴胄調補修文生明經擢第緇帷連夕拜之所紫
禁迹朝聞之地圖書所會館宇生光解褐同州參軍
事譽警北曹聲馳南府地靈天秩渾金樸玉之材主
吏參卿孫楚蕭何之德屬軒坐卜遠禹山斯會撫遺
劍而空存想遊冠而無及松蘿漢隧竹染湘川雖鏤
鼎銘彝將勒生金之字而庇徒葺事終資倚玉之材
課効居多恩腴俯逮特授蒲州司戶叅軍事俄以親

累左授夔州雲安縣丞賈誼長沙屈原湘水溪連五
毒攀鳥路而銜悽峽帶三巴聽猿聲而下淚秩滿丁
府君憂去職三年泣血七日絕漿殆不勝喪幾於滅
性服闋調補衢州司倉叅軍事秦稽負日楚夢含雲
東連射的之山西拒沈珠之浦上農攸屬倉廩爲禮
節之先下位斯安等列處儕流之首尋沐恩旨雪其
親累一遇雲雷之施再生花萼之榮旣席寵而沿恩
亦流根而泊葉君之兄義材望冠時聲名動俗膺奮
飛而首出指寥廓而曾騫位纔陟於聞鶯才實兼於
綠鵠旣而八龍雙驥慈明與劉岱均飛二陸三張士
衡與孟陽齊價豈直家風祖德見稱於中旨掌紼司

綸復傳於後葉光輝所燭朝野增榮然則宅火均司
象雷分邑莊周著小鮮之誠尹何招美錦之嫌列五
等於姬封高十城於漢秩字育之道循良是資擢授
潤州句容縣令瑤山奧壤金陵舊地郊原枕端委之
墟江漢擁朝宗之水海潮驚而翔鷺起山氣合而盤
龍見物產殷積水陸兼并人多挺劍之雄俗有亡珠
之弊君達於時事明於政理教不嚴而自肅化不令
而人從毗黎感惠愛之如父母奸邪屏迹畏之若神
明戶口滋豐田疇墾闢行太丘之道德息灌壇之風
雨國家下武膺運中興纂業氛祲廓除日月開朗君
遇見知之主逢時來之運若魚縱壑如鴻順風優制

所覃崇班益峻加朝散大夫上柱國紫泥流渥朱紱
昇榮列五采之通班連九章之賁飾於是貴而思降
盈而知損如絲之旨載流亂繩之化愈息先是邑居
湫陋里閭榛蕪爰自厯政未遑加緝君乘三餘之隙
因四人之暇覽山川之體勢量資物之豐省逐便興
功因時改作人無廢業役不浹辰流一切之權道成
累代之宏業頃緣稼穡頗口災亢雲漢之詠徒勤京
坻之望斯絕君親加暴露徧請山川率毗庶以具馨
香俯壇場而展誠敬濃雲布族膏雨成絲絲八極而
俱灑通四溟而廣徧自非仁心所及誠感必通其孰
能預於此乎加以道尚朋執情敦譙喜每至星搖劍

室月下珠潭菱津迴棹女之喧桃逕詠樵童之樂臨
萬家之井邑眺千里之風煙良談閒起清文不輟信
可謂兼文兼武公才公望者焉聖上深視九重高居
萬寓迺睠時政分命使司端冕旒而思天下布德澤
而周海內博訪英髦探求異術十道飛駟萬域承風
江東黜陟使朝散大夫行度支員外郎攝右臺侍御
史源乾曜崖岸孤聳風飈秀出千仞罕節百尺無枝
地入星臺列珠軒而應翟庭分月樹搖鐵柱而驚鳥
冰霜凜白簡之威霞日聚繡衣之色遙同李邵上迴
星鳥之暉俯類張綱先攝權豪之氣以君才地加之
聲實每肆揄揚先膺荐舉王生千里佇入於匡佐荀

氏十旬行登於台府顧盼之重郡縣增榮馳表疏於
龍閣遽翻飛於鶯路隨郅詵而齊舉攀鄧攸而不留
黯黯津亭搖搖軒騎壽春遺犢將折轅而共分葉縣
歸鳧逐行舟而俱遠由是三吳士庶二江人物來暮
之歌方遠去思之戀益深期穀君於一年思段侯之
再撫丞魏烜家承軒冕代傳儒墨鳴謙自牧處劇若
閑以涵牛之巨量貳割雞之小道主簿崔子全相門
卿族玉葉金柯光彩可以射人風神可以凜俗尉李
芬張隱朝章佩嘉勗等並公侯復社琳瑯積譽經史
足用刀筆推工甄迴東道之姿多屈南昌之化鄉望
等或者年宿望或盛族名家負雲澤之懷寶馳水鄉

之俊逸山川舊迹龍蟠武踞之間軒冕餘風東箭南
珍之亞並歿和浴道多從食堪之恩老安少懷久沐
惟桑之化雖功成帝力上皇之耕鑿已勤而事稟圖
經下邑之風猷可紀是用傍遵謙簡俯緝謳謠嚴南
襄之故事採西郭之前躅飛丹屑瓦行杼雕金之思
相質披文無媿沈碑之浦其詞曰
山岳氣河汾孕為基構百尋源流千丈地靈塊軋
天姿肸鬩長建侯襟懷洞朗江陵奕載風颯峻上
曠隱鉤深知來藏往斷雕為朴用晦而明文緯天地
武定縱橫如周稷禹似漢良平金社開封珠盤載盟
逝矣遐緒猗歟克生

續齊書

六

案碑詞每段六韻唯此明橫平
盟生僅五韻必脫去二句也未

見拓本姑補乘彼靈慶光斯燕翼道映時宗言爲士
此以侯再補乘彼靈慶光斯燕翼道映時宗言爲士
則月鏡虛湛雲峯迴植藝蘊縑細材經邦國金玉其
行筠篁其德鶴鳴不已鴻飛未息欲麗九成先階一
匱比迹庠序聯芳旌旆軒坐卜遠禹山云萃倚玉推
才雕金纂懿秦關漢輔吳田彌地孫楚叅卿蕭何主
吏鴻鐘待扣明鏡不疲詞端筆杪月落雲披時更出
處道或推移曾參盡孝賈誼傷離五湖東指三峽西
窺六修齊稟百里均知帝道光亨聖人有作如鵬得
吹似魚縱壑越自奮飛載翔廖廓珠江控海金陵負
郭夏禹經營農皇甄度星躔牛斗雲連蜃閣令長何
擇循良在茲駟駕必賤雕鏤馬期政實無擾人稱不

欺韋弦是緝冰玉攸資禱憂河甸獸斷江湄蝗去無
限鸞歸有時八使出關二星向蜀乘驄衣繡揚清激
濁黜陟攸先椎埋是屬上敷帝念下從人欲一聽謳
謠載欣風俗行收顧盼坐成珠玉若管知鮑如蕭待
王君子既見爲龍爲光選衆而舉載揄載揚飛日
路驛薦雲莊眇眇雲澤願願水鄉西北萬里東南一
方坐結去思長嗟來暮躑躅輦壤昭遙鴛路何以報
恩宸階遠訴何以旌德高碑迴樹滂岳創詞楊修辨
句一刊懿迹千齡垂裕景龍二年歲在戊申二
月十五日建朝散大夫行雍州錄事叅軍張景毓字
燭微撰業行寺主釋翹微書

唐故朝議郎行兗州都督府方與縣令獨孤府

君之碑銘

唐劉待價

聞夫軋蓋上闢星緯分其纏舍坤輿下蟠河岳裂其封域是以觀象體物建百里之庶邦敦俗牧人置千石之多士則有威霽風雨稱明鏡於當時德洽絃歌号元龜於後葉其有繼美宣化教肅刑清作根本於巖廓為喉命於黔庶休明一代映徹九泉歷選徽塵歸獨孤府君矣公諱仁政字仁政河南洛陽人也本姓劉氏導擾龍之巨源長河不竭疏斷地之曾岫連岳無窮屬逐鹿於中原乃避時於北漠因山易姓以氣雄邊及魏室之鬱興服袞論道遷周邦而扈從衣

錦還鄉吐奕葉而增昌朝盈紫綬聳本枝而逾懋郡接朱轡菌謁紛綸可畧而述高祖永業齊中書舍人南道行臺右丞洛州刺史遷左丞加散騎常侍儀同三司特進行臺左僕射封夏州靈縣開國公武安郡開國公廣州德廣郡開國公西平郡開國公瀛州章武郡開國公彭城郡開國公各食邑二千戶賜鼓吹一部絹布各二千疋錢卅万俘口三百餘人馬五十疋轉七兵尚書兼吏部尚書入周拜司徒公行臺尚書令冊臨川王大司寇少右弼謚曰貞佩金章於黃閣縮盤綬於玳筵內助理於萬機外佐平於百揆奇籌獨運戶邑光於六封雅樂相喧鼓吹標於四錫

會祖子佳周柱國直閣將軍武安郡開國公華州刺史儀同三司隨大將軍淮州刺史應國公拜壇虎將祠黃石以傳書刺郡神君褰赤帷而察俗賞茅土於奧壤以答元功進儀服於太階還尊懋德祖義恭隨京兆郡富平縣令唐秦王府倉曹參軍事荆王府長史右衛郎將左衛中郎將左監門率溫汾歸婺四州諸軍事婺州刺史上柱國高平縣開國侯雍容朱邸陪文雅之良遊巡警紫微膺爪牙之重任百城宣化得賈父之能名五等開封獲通侯之美稱父士贇唐宏文生文德皇后挽郎虞庠之胄必擇士林楚挽之郎寔資門蔭選授霍王府戶曹參軍事密王府兵曹

參軍事原州都督府戶曹參軍事轉汴州尉氏縣令遷坊州鄜城縣令上騎都尉行丹州司馬襲爵高平縣開國侯幕府端簪聞爲善之最樂列曹從務佐激濁以增清叔孝擒奸智窮於耳粟伯騫薦士語重於笥金孫氏襲侯尚食漢開之地謝庭蘊玉還光席上之珍惟公騰秀二儀降精五緯髫年對日綺歲元成千里之權竒望雲驪首刷五色之毛羽抱義賓王起家皇朝左勳衛左金吾引駕出警入蹕統式道之朱麾夜傲朝巡司禦戎之金革解褐思州司倉參軍事像水之平法紘之直遊刃盈庭之訟發蒙列局之疑掌十二之人天致菽粟之流行改授宣州溧陽縣

承南服水鄉北斗星分吳越雜錯士吏剽輕公贊銅
章以化人持水鏡而照物季俗爲之懲革淳風由是
興行轉朝議郎上護軍行兗州都督府方與縣令法
三異之化振百里之雷敦禮義以教人薄聚斂以富
俗女脩織襪不下三齊男務耕耘還登九穀惟埋止
息桴鼓於是稀鳴囹圄空虛簡牘以之無事旣而焦
延罷職上書願留劉寵去官攀轅而送方同胡紹專
城之任克遷遽等宜尼倚戶之吟斯作以景龍二年
三月廿九日遘疾卒於河內郡之私第春秋七十有
七士喪衣冠道亡儒墨德音何在恨九言之不追魂
氣何之痛百身之無贖惟公抱素懷璞蹈孝履忠蘊

智成囊含明作鏡敞三白之虛室汎登仙之桂舟酌
其流而感淺深庇其宇而忘寒暑儒林罕月武庫驚
雷六義分落錦之篇八體下崩雲之陣阮公琴酒情
盤脩竹之閒尸子登臨神王長松之下清門赴弔無
雜号之賓儉室奉終靡一金之產可謂至德君子人
之楨幹者也以景雲二年歲次辛亥二月景子朔廿
七日壬寅遷窆于洛州河陽西北韓城鄉龍臺里之
平原禮也馬啓滕城鳥飛楊墓晚風含怨託松柏以
揚聲斜日緘愁向煙雲而沮色嗣子宗業隆堂構孝
極天經攀翠柏以長悲奉元醪而永慕想元成之祖
德遂述家風鑒陳寔之貞碑爰題翠琤庶陵移谷變

竹帛非堅而懿德嘉聲乾坤等固其詞曰
擾瀧疏派斷地分族遇亂中原避時北服因山易姓
待時干祿其一北魏稱帝佐命為臣爰從鳳蹕式返雞
津祚茅食采華轂朱輪其二踵德誕美韶姿令器渾金
璞玉霜鶴雲驥論起談天詞成擲地其三振翼鳳穴統
武兵欄捧戟侍帝綰綬除官霜凝吏道花飛筆端其四
一同蒞俗五美興化剗劫懲奸嗤眩息詐女脩纂續
男務耕稼其五攝官稱謝攀轅告歸佇遷喬木奄落斜
暉昊天不慙與吾何違其六相彼青烏啓茲元室編駟
發軔丹旒颺日九原不返千秋永畢其七媚人悲而結
情弔鶴思而氤氲灑泣珠之露松纏慘玉之雲爰

勒銘於元石以作固於清氛其八 □□劉待價撰

吏部常選宏農劉珉書碑出孟縣前未見

大周故鎮軍大將軍行左鷹揚衛大將軍兼賀
蘭州都督上柱國涼國公契苾府君之碑銘

并序

唐婁師德

原夫哲后時乘璧人貞觀必俟風雲之應以光朝列
尤資棟榦之材式隆王道若乃傑出文武挺生才俊
道符忠孝性與清白高視於寇賈之前獨步於韓彭
之上脣響名教蟬聯簪組許史焉可儔金張莫能匹
四海慕其風範千里仰其談柄玉質金箱探曠索隱
沒而不朽其唯賀蘭都督涼國公之謂哉君諱明字

若水本出武威姑臧人也。璧期爰始，賜貫神京，而香
逐芝蘭，辛隨薑桂。今屬洛州永昌縣，以光盛業焉。原
夫仙窟延祉，吞霄昭慶。因白鹿而上騰，事光圖謀。遇
奇蜂而南逝，義隆謙簡。邑怛於是亡精，鮮甲由其禡。
魄恤允於前涼之境，茂俗於洪源之壑。良史燹焉，此
可畧而誌也。曾祖哥論，易勿施，莫賀可汗。遞襲珪璜，
夙傳弓冶，共棲梧而比翼。與良玉而齊價，濯如春柳，
勁逾霜竹。英名振白山，雄圖光紫塞。祖繼莫賀特勤，
積代為英傑之先。光圖絢史，保家為名教之首。揆今
超昔，宏材膠葛，洪源浩汗。映竹史而騰芬，綴錦書而
擅響。父河力鎮軍大將軍，行左衛大將軍，檢校鴻臚

卿檢校左羽林大將軍，上柱國涼國公，贈輔國大將
軍使持節，并汾箕嵐四州諸軍事，并州大都督。謚曰
毅公。塋積膏腴，門標英偉。發言會規矩，動容成楷則。
學該流畧，文超賈馬。威青海而安白道，光三部而截
九夷。揆務棘司為羣寮之宗匠，膺榮蘭錡成五戎之
準的。而鍾漏斯盡，而贈崇班。聿加千里之榮，俄處六
條之位。哀榮之禮，既洽朝野。式瞻送終之典，更隆摺
紳翹德。公赤野生姿，青田矯翰。家蓄古賢之操，門傳
高士之節。年甫一歲，穉上柱國。封漁陽縣開國公，食
邑一千戶。八歲起家，穉太子左千牛。十一，穉朝散大
夫。太子通事舍人，裏行。十二，穉奉輦大夫。若夫紫禁

青規之所必擇賢而方稱玉階金闕之前實高門之
攸處所以榮加髫髻澤及綺紈鳴玉鏘金光前映後
乃人物之儀表實衣冠之領袖重以河山險要惟賢
是居爪牙任切非親莫委麟德季中稱左武衛大將
軍賀蘭州都督自非承家奕葉累代衣纓焉可內奉
鉤陳外應刺舉者矣相府在藩為涼州道元帥以公為
為左中軍總督侍中姜恪為涼州鎮守大使以公為
副然則朝端妙選實佇異能望重材高允膺僉屬後
以鼃海未清虵川尚阻戎車所及尤俟英將從中書
令李敬元征吐蕃公為百海道經畧使於入南討吐
蕃北征突厥累摧兇醜勲績居多後狼山及單于餘

續列傳

北

黨復相聚結奉制討擊應時平殄前後賢勞不可勝
紀改稱左驍衛大將軍襲爵涼國公食邑三千戶賜
錦袍寶帶金銀器物雜彩綾錦等數千件稱長男從
三品以酌功也仍改為燕然道鎮守大使檢校九姓
及契苾部落公倣裝遵遠望赤水而前驅勁騎騰空
指白蘭而長鶩左縈右拂八校於是爭先斬將擐旗
三軍以之作氣遂得降絲言以隆爵命自而府而錫
珍奇金貝咸紆繒錦交集列鼎而光祖祚分茅以惠
子孫策勳居取又稱雞田道大總管至烏德韃山南
招降二萬餘帳縱使李牧蓋部魏絳和戎推昔揆今
當季冈二尋稱右豹韜衛大將軍未幾復改稱左豹

續列傳

北

韜衛將軍并充懷遠軍經畧大使又依舊知燕然道
大使公高望重亟膺獎擢得人之譽聞於朝野惟大
周革命重懸日月擢稱鎮軍大將軍行左鷹揚衛大
將軍餘並如故有制曰鎮軍大將軍行左鷹揚衛大
將軍兼賀蘭州都督契苾明妻涼國夫人李柔順成
姿幽閑植性聿脩婦德每勤於丕道叶贊夫家必存
於忠義既竭由衷之請宜覃賜族之恩并及母臨洮
縣主並蒙賜姓武氏公侯必復河洛胄賢屬寶運之
開基接僊潢而錫派忠貞無替聲逾金氏表裏承恩
勲高石窳後穰朔方道總管兼涼甘肅瓜沙五州經
畧使度玉關而去張掖棄置一生暇弱水而望沙場

橫行萬里幄中有策闢外宣威豈直操履冰霜固亦
心符筠玉名高一代氣逸九霄者矣既而司寇逝川
俄結頽山之恨將軍大樹行聞斷石之嗟悲夫以羣
證字案餘已見順璽元季臘卅月字順陵廿三②遭
疾薨於涼州姑臧縣之里第春秋冊有六制曰悼往
贈榮經邦之懿典飾終加等列代之徽猷諒以褒德
勸能念勞追舊者也故鎮軍大將軍行左鷹揚衛大
將軍兼賀蘭都督上柱國涼國公契苾明理識開舉
局量沉雄家著勤誠代彰忠懇早膺朝寵夙紹庭規
秩峻銜珠寄隆賜鉞入察巡警恭慎之譽必聞出綏
藩落威惠之聲兼濟②轡不留夜舟俄徒未窮遠畧

奄謝昭途。燹想嘉庸。良深矜歎。宜申殊澤。式旌幽壤。可贈使持節都督涼州諸軍事涼州刺史。餘如故。賜物三百段。便於涼州。給付所緣葬。一事以上。並令官供。仍著涼州都督府長史元仁儼監護。仍令朝散大夫通事舍人內供奉邊懷秀弔祭。既而居諸易遠。宅兆攸資。金鳧泛泉。玉雞伺旦。粵以大周萬歲通而元季。歲次景申。八^甲庚午朔十五^乙甲申。葬於咸陽縣之先塋。禮也。禮司謚曰公。夙承門闕。早踐通班。茂績昭宣。聲望顯著。學該流畧。藝總兵鈴。以孝安親。以忠奉國。終始如一。存歿不逾。旌善易名。宜憑典實。按謚法。寬樂令終。曰靖。請謚曰靖公。惟公降^瘡粹而蓄瓌

竒稟精忠而挺才望。韶儀淹雅難窺於得失。逸調清通不測其涯涘。抑揚人傑。彫績士林。等桃李之無言。若朱藍之在性。先仁而後己。鄙利而尚賢。亭亭有干丈之幹。其高非易仰。汪汪如萬頃之陂。其深不可測。有碩學焉。有令問焉。擅非馬之雄辯。蓄靈虵之雅作。逸氣上煙霞之表。高明振朝野之際。五公七侯之盛。僅可執鞭。曜蟬鳴玉之榮。纔堪捧轂。如揚彪之丞伯。起若班固之嗣叔皮。加以懸榻翹賢。分庭接士。衣裘鞞馬。朝成夕費。兼濟之性。光映人物。乃構厦之良材。映車之名寶者矣。夫人唐膠西公孝義之長女也。齊輝婺彩。擢幹瓊枝。莊敬率由於天然。抑揚女史。溫柔

稟之於本性光輝內則既而雄劍潛鋒崩城起恨毀
瘠逾於大禮攀號泊乎剪髮夷夏足其悲哀搢紳增
其慘感屈己而遵大誠飭躬而宣婦道可謂承家稟
訓執仁組行者歟長子左豹韜衛大將軍兼賀蘭州
都督上柱國涼國公從次子右武威衛郎將上柱國
姑臧縣開國子嵩右玉鈐衛郎將上柱國番禾縣開
國子崇等並早涉義方夙延庭訓孝心冥弊至德純
深及候氣纏憂先嘗空術充窮盈感鴻慕增悲棘兒
由乎絕漿柴毀幾於滅性可謂至德冠幽明窮迷傷
骨髓哀號躡躡獨超前輩雖凶極之誠踐霜露而逾
感相質之重映今古而垂裕是用傍求翠琬式樹豐

碑家風祖德居然在斯用以光土行用以芳本枝歷
千秋兮無斃經百代兮無虧銘曰
東井蒼蒼西土茫茫而開分野壑列封疆門多英毅
代產忠良偉哉人物紛乎典章其前涼後涼乃祖乃
父赫奕冠蓋蟬聯文武金箱玉質光台映輔至德符
孝貞心翼主其可汗嗣出抑揚流輩業盛后昆道隆
前燹遐迹欽挹夷夏欣戴四海英髦共推貞槩其特
勤垂裕博風振翼孔席申歡嵇松比直智水游泳仁
山止息討本尋源斯標岐嶷其毅公雅節莫之與京
既忠且孝王佐人英研精流畧捐口良平昭昭餘慶
恤允膺榮其挺生異材齟孽振響未盈小學亟承恩

弊門閥易隆墻仞難仰學行無數名實逾廣其露冕
關河式清邊傲遽宣威德聿敷名教肅彼夷落鎮茲
襟要人揚德宇窮微盡妙其綏邊奇重尤資望族顯
允奇材悠然嗣福外清荒憬內膺榮祿總戎之寄聲
連祕牘其洗洗于隰屢警邊城侵乙躍馬槩甲揚旌
橫雲列陣背水開營未經千乙俄夢兩楹其光驚繡
留居諸易促旋悲委珮遽傷埋玉松陰隴兮均青草
榮墳兮吐綠式鏤貞琬以光勝躅其先天元年
歲次壬子十二月十六日辛亥孤子息特進上柱國
涼國公嵩立父碑 肅政御史大夫上柱國婁師德
製文左肅政御史殷元祚書今石本損泐據正太
史唐碑錄存載之

大唐處士胡君墓誌并序

君諱佺字尚真定安人也遠祖回宦遂尻介休夫棖
椽是佐錯胡綜之文章清白知名見胡威之父子光
光懿烈不替先風簡課詳諸可畧言矣祖買隋孝廉
舉文林郎幼洽詩書長崇禮樂太初玉樹夙擅嘉聲
韋氏金籛遽昇高第父端養素不仕情貪野薛志篋
裘裳道王丘琴跡存山水君濯濯儀形汪汪軌度珠
胎孕月光彩絕倫蘭若銜風幽芳自遠鄉里稱善喻
彼少游文籍自娛同夫孟陋遺累鄙滓傲性煙霄簪
軒不介於懷寵辱不驚其慮歲臨辰巳鄭康成於是
云亡月犯少微謝慶緒俄而致殞春秋七十卒于私

弟夫人石氏穠荷比秀美箭齊貞宜其室家和如琴瑟翰林之鳥始雙飛而隻飛龍門之桐俄半生而半死嗣子懷爽懷玉帖屹長違霜露增感粵以開元三年歲次乙卯龍集單闕十月己酉朔廿五日癸酉遷窆於介休縣東廿里平原禮也縣上山傍昭餘澤右懼陵谷而驟易思封樹而永懷乃爲銘曰
盤根安定散葉汾壖乃祖乃父光後光前惟君節槩業尚虛元鬼瞰庭宇鳥鳴座筵不逢石髓俄歸玉泉一闕丘隴長嗟逝川

唐故葉有道先生神道碑并序唐李邕

昔者誕發老君道純天地生得夫子身負日月且時

宰不宗主人勿用矧乎埋照後谷潛盤窮山幽姿蛻於塵容素尚允於仙類豈辟命行矣爵服繫之而已哉公諱國重字雅鎮南陽葉縣人也自少典錫羨高辛纂緒陶唐重熙后稷邁種文王之允乃食於沈尹戊之子載封於葉受氏享國大哉邈乎逮乎祖乾昱克壯其猶永孚於德堉戶習隱塞兌億坤碩膚長材通理博藝雖安車累至而堅卧固辭故慶祚克開眉壽維永矣厥考道興性守宮庭道敷邦國居鬼從地率神從天受錄以但之飛符以北之扼魍魎之邪劉臺台之崇有足竒也至於揮札落紙引弓貫革特起五部廣推大餘侯誰嗣哉先生靈承道宗異聞訓誘

弱喪文貌幼尚純篤仙骨有象童心不萌專精五龍
遍遊羣岳聰以達遠明以察微達死生之占體物氣
之變嘗靜貞動耗息影歸止雲外口壑林巢仙居人
絕不鄰道阻且右獨往幽勝永歌隱淪放聞保和習
虛致靜摺五石之髓擷三芝之英時哉不留歲聿其
逝縮髮純漆韶顏渥丹事適元同神與道媿惟寂惟
寞不飲不食數十載於茲乃昇聞帝庭駿發皇眷簡
才受命降尊加禮將之以文馬速之以暢轂先生盱
眙長揖握手高謝曰自昔帝舜登庸德輝允鑠光武
繼統吏道孔嘉且薛方逢萌備外臣之禮虞仲夷逸
終處子之業豈垢俗疵物偏貢介性將探道慕類坐

致竒齡使者蓄而之疑申遂行之旨乃周覽廬室躬
省倉廩考疇人之疆晦訊家童之作業皆儉以遵約
安能維始味不甘口色無養目信以爲著誠去僞敢
守難奪順風可卽強起曷至焉遂虛覲復命慙歎聞
列朝廷企其高渴其道聆嘉聲而屬口者豈勝言哉
有司以天元書缺星度官弛亡五德之運謬四時之
分荆鬼越祥不知所況子亥母癸烏識其原皆乘遠
遠尋請益傳受可謂繩誠列而曲直徵衡誠懸而輕
重立粵惟博物君子豈伊小說鯁生嗚呼天不持久
人將復歸積年迫於期頤遠志屈於摧落卜兆幽石
託墳清林逸人不追國士靡憲泉石沮色鄉縣失聲

豈無他人惟子之故允子慧明贈銀青光祿大夫歙州刺史公因替厥繇代增其業啓祕錄之高妙揚元津之洪波道微若聲心麼若氣吹律煖谷運陸知天屢下辟書終不應命孫子景龍觀道士鴻臚卿越國公幼得父書早傳成法夤念有訓邁迹自身讀天下之書備方外之術火滌淫祀劔誅羣妖恩開五君名動四國其入也排金鎖謁紫庭爲帝傲吏出也法玉京坐元寺作仁宗師故能大匠道門豕卿朝右禮食軒座寓直禁癘矣嘗以理氣自強登老益壯雖暮景急節而純孝孔哀是獻封章願拜墳墓有軼帝念載形王言神札以飛傳瑞乃發羣公帳餞列蕃郊迎朝

輝有章鄉人皆慶枉以末技揚於孝心惟先志以追遠立豐碑以紀德夫何閒然其詞曰宗門素履家代隱仙道一相孕薪火交傳黃公術左赤水珠聯道開幽鍵性與真筌一門累祖四世百年抗迹巖谷消聲天地卓尔遐舉藹然高致麝以臭焚珠以明墜人則有心徵亦不至保身匪媮全樸爲利孝孫增業明辟順風志嘗無忝事或不同徵賢朝滿舉逸山空曷由高枕克謝代工測微達變盡規納忠皇眷雖渥孝思亦深章服粲粲傳駟駟載違廷闕是展墳林紀石追遠昭銘率心孝終事立榮歿寵今遐超古始永憲江南
開元五年歲在丁巳三月

七日括州刺史李邕文并書處州志載此文為法善使李邕夢中書之故名

追魂碑錄以志異聞

大唐贈歙州刺史葉公神道碑唐李邕

公諱慧明字德昭南陽郡人也其先系自軒后殄于周文聘季食沈子高封葉因為氏矣逮問政口孔好龍得真代有聞也昔者惟帝興運乃聖炳靈風雲相從卜夢通感閒氣駿發良弼大來有開必先憑物為為因自然矣則我使君降僊府乘道流追縱隱淪叶契幽叟結廬湖汴考盤巖椒同人利貞遁代勿用雅好酒德尤邃老經話言解頤精口絕倒誘進不倦虛納盡口好事集門長者闔里每至升月帷戶咏風林

薄植杖嘯谷席皮琴山泰然樂生澹乎忘老方其維性壽遡神僊徇赤松之遊縱黃■之術外身先物歸根致柔緣以大均持以大定色理不盪寵辱不驚繩繩焉熙熙焉孔德之容罔可測已故師長旌禮邦族與化智者謂智仁者謂仁雖褐塞桑樞紵衣韋帶必避途加敬襄風惕息焉是用克聞於家大育厥允則我越公襲上德延慶靈生而知之學而習之有專門之資得不承之業纔齟犴道既冠同元訊遠岳之福庭觀幽尋之方士陳呪雷駭吐刃電光沈海莫濡蹈治匪焚呵萬鬼搗百神啓陰官之符變冥司之錄追究往事坐知來茲膏肓無所遁其形霧露不能滋其

疾竒跡多緒嘉聲日聞是以大君孔休辟命荐至入
自卧内問以咎徵造膝必誠遇事借中時更四紀代
且五王順風以請天師敷衽以近皇極緇素莫能出
右公卿是惟虛左國家有事天地將旅海岳公嘗致
禮加璧能事潔羞傳駟載途郡邑迎謁者歲四三焉
自頃賊■嗇袖小人吹蠱敢爲戎首興此厲階天步
未亨人事將殆公乃極陳幽贊大啟聖猷枚卜撰辰
並走羣望作爲邦翰先■主憂殄勦元兇翼扶皇統
是嘉厥異式揚爾忠爵賞懋於身寵贈光乎考匪此
父也曷訓其子匪此子也曷揚其親松楸已行碑板
未立永念終古追存孝思驟請闕廷第如江介遠訪

才子枉逮鄙夫趙括論兵多缺舊學班固述史寔賴
家書顧惟成章實愧貞石其詞曰示
真隱夷軌默僊解形倬哉獨立企古遐征殆庶元德
升觀丹經服鄉不涅光味無營築上岑渚上藥待琴
徐嘯風谷緩步月林白雲怡意清泉洗心曷勝不往
曷竒不臨迹因神遠情隋地深舉代方籍皇家未軾
肇■懿子載揚令德左慈致物越人辨色司察鬼謀
役使神力寵被五君聲聞八極日嘗薄蝕國有多難
兇慝扇揚忠烈憤惋亦旣先覺克■幽贊皇哉神武
赫然天斷薄言卽戎于以戡亂帝念疇庸典開列土
豈曜厥身寔贈于父朱藩乃錫紫綬是與存致歿榮

忠伸孝舉烈烈桐柏緒風興悲表墓有闕紀德無詞
哀哀嚴蔭爨爨孝思孰傳終古是建豐碑 贈慧明
銀青光祿大夫歙州刺史子道士濃善授鴻臚卿封
越國公 開元五年太歲丁巳鶉尾七月夷剽七
日甲辰建江夏李 國子監太學生
故銀青光祿大夫祕書監兼昭文館學士侍讀上柱
國常山縣開國公贈潤州刺史馬公墓誌銘并
公諱懷素字貞規本原扶風其先自伯翳馬服具諸
史載暨漢南郡太守融命代大儒公即其後也十一
代祖機抗直不撓晉御史中丞扈元帝渡江家南徐
州丹徒故今爲郡人也代以學聞高祖涓博綜墳典

仕陳爲奉朝請曾祖法雄慷慨倜儻好孫吳不事筆
研陳橫楚將軍祖果願碩學禮經不隕素業即學士
摳之從父兄也少爲尚書毛喜所知陳本州文學從
事父文超果行毓德精意易道及洪範頗曉氣候貞
觀中以有事遼溟筭名勲府龍朔初黜陟使舉檢校
江州尋陽丞棄官從好遂寓居廣陵與學士孟文意
魏令謨專爲討論具有撰著公即尋陽府君第三子
也幼聰穎六歲能誦書一見不忘氣韻和雅鄉黨以
爲必興此宗十五徧誦詩禮騷雅能屬文有史力長
史魚承瞍特見器異舉孝廉引同載入洛口尚書倉
部郎河東裴珍之博學深識見名知人音旨儀形海

內籍甚公年甫弱冠便蒙引汲令與子研覃遂博
遊史籍無不畢綜以文學優贍對策乙科乃尉郿無
何丁太夫人人口口憂卽陳學士宏直曾孫女也本自
名家貞高博識公在艱疚骨立柴毀殆不勝喪服闋
授麟臺正字少監京兆草方直好學愛士善飛白書
以公旣及冠禮未嘗立字遂大署飛白云懷素字貞
規扶風之學士也封以相遺其爲時賢所重如此以
忠鯁舉除左鷹揚衛兵曹參軍轉咸陽尉皆則天太
后大崇諫職授左拾遺深盡規諷尋改左臺監察御
史歷殿中彈紉不避強禦加朝散大夫轉詹尹丞朝
論稱屈遷禮部員外郎與范陽盧懷慎隴西李傑俱

以清白嚴明分爲十道按察以公詞學贍洽精覈文
章轉授考功員外郎修文館直學士遷中書舍人與
李义同掌黃畫踰年檢校吏部侍郎實允僉屬朝廷
以刑政所急改授大理少卿關畿行林除豳州刺史
惠實在人入爲太子少詹事判刑部侍郎加銀青光
祿大夫兼判禮部尋而正除刑部時稱慎恤轉戶部
侍郎上以河南蝗旱令公馳驛賑給宣布聖澤所至
甘雨使迴拜光祿卿遷左散騎常侍轉祕書監四部
舛雜頗多殘蠹公備加按定廣內充積加兼昭文館
學士與右散騎常侍褚无量更日入內侍讀每至宮
門恩勅令口小舉上殿自車丞相已來殆將千載始

見此禮公疇日自序云慕善嫉惡好學潔己自謂不
慙古人無負幽明矣直哉是言不騫厥信以開元六
年三月十日遘疾中旨遣御醫賜藥相望道路以開
元六年七月廿七日終于河南之毓財里第春焮六
十皇上輟朝二日舉哀口次乃下制曰存樹高烈君
子所以立身沒垂令名古人所以貽範銀青光祿大
夫故祕書監兼昭文館學士侍讀上柱國常山縣開
國公馬懷素越箭含貞楚材登用清芬獨暎至德可
師自服勤典籍納訓惟辰輔朕以燉道弼予以正言
允資惠迪實表泉懿而曾不愆留歎焉彫落思甘盤
之舊學臨宣明以增歎興言感愴用震悼于厥懷可

贈使持節潤州諸軍事潤州刺史贈物三百廿段米
粟三百廿碩喪葬所須並令官給京官六品一人檢
校公雖累登臺閣率身儉素俸祿之資賙贍親友及
啓手歸全家無貲產唯有書數千卷以為燕翼以其
年十月十三日寔於洛陽古城之北原禮也有子異
等雖年在童孺禮過成人棘心爨爨感于隣巷敬勒
行事以旌泉戶銘曰

益佐理水功施生人羨于馬服守趙却秦東京戚資
南郡儒珍德先惟永弈弈振振其朝請風素橫楚矛
戰從事顛禮尋陽洞易公自名家伏膺經籍鼓鐘外
遠純涂字未詳內積其用材南楚待問東堂持斧作憲

含香拜郎再飛禁掖七踐文昌國傳茅土巷擁旗常
其并春紛綸桓榮稽古行儒師逸高跡誰伍公實踵
之堂奧斯覩匪徒外潤爰歸內補嘒惟昔殷后學于
甘盤一期千載遇君則難充堂何那其臭如蘭懿哉
夫子斯言不刊五其仁謂必壽神期式穀生寄雖浮夜
趨何速寵極韓賜恩深衛哭徒望邢山豈忘喬木六其
崢嶸徂歲寂歷空岑白日無影寒雲半陰燕城表滅
漢水碑沈貞臣之墓樵牧誰侵七其

後漢大司農鄭公之碑

唐史丞節

夫囊括宇宙者文字發明道業者典墳所以聖人作
而萬物覩賢人述而百代通禮樂得之以昭明日月

失之而憲武宣尼彰刪緝之功秦始皇速焚燒之禍迨
乎羣儒在漢傳注瑤口莫不珠玉交輝纖微洞迹同
見集於芸閣獨有輟於環林豈若經教奧義圖緯深
術兼行者多無如我鄭公也公諱元字康成北海高
密人也八世祖崇哀帝時爲尚書僕射公少爲鄉齋
夫不樂爲吏遂造太學受業師事京兆第五元始通
京氏易公羊春秋三統歷九章算術又從東郡張欽
祖受周官禮記左氏春秋韓詩古文尚書攝齋問道
掘衣請益去山東而入關右因盧植而見馬融考論
圖緯乃召見而升樓精通禮樂以將東而起歎三載
在門十年歸邑及黨事起遂杜門不出隱修經業於

是鍼左氏之膏肓起穀梁之廢疾而又操入室之戈
矛發何休之墨守陳元李育校論古今劉瓌范升憲
章文議何進延於几杖經宿而逃袁隗表爲侍中綠
喪不赴孔融之相北海屣履造門陶謙之牧徐州接
以師禮比南山之園皓鄉曰鄭公類東海之于君門
稱通德漢公車徵爲大司農給安車一乘所過長吏
送迎公乃以病自乞還家董卓遷都長安公卿舉公
爲趙相道斷不至會黃巾寇青部乃避地徐州建安
元年自徐州還道遇黃巾賊數萬見公皆拜相約不
敢入縣境時大將軍袁紹總兵冀州遣使邀公大會
賓客迺延升上坐身長八尺飲酒一斛秀眉明目儀

容溫偉客多豪傑並有才說見公儒者未以通人許
之競設異端百家互起公依方辨荅咸出問表皆得
所未問莫不嗟服將汝南應劭亦歸於紹因自贊曰
故太山守應仲遠北面稱弟子何如公笑曰仲尼之
門考以三科回賜之徒不稱官閥劭有慚色門人相
與撰公荅諸弟子問五經依論語作鄭志八篇公所
注周易尚書毛詩儀禮周官禮記孝經尚書大傳中
候乾象^歷又著天文七政論魯禮禘祫義六藝論毛
詩譜駁許慎五經異義荅臨孝莊周禮難凡百餘萬
言經傳洽熟稱爲純儒其所撰著今並通習是知書
有萬卷公覽八千也齊魯開宗之公後嘗疾篤自慮

以書戒其子益恩曰吾家舊貧爲父母羣弟所容去
廝役之吏游學周秦之都往來幽并兗豫之域大儒
得意有所受焉遂博稽六藝粗覽傳記時觀祕書緯
術之奧年過三十乃歸鄉假田播殖以娛翰宴後舉
方正賢良有道辟大將軍三司府公車再徵比牒併
名早爲宰相惟彼數公懿德大雅克堪王臣故宜式
敘吾自忖度無任於此但念述先聖之元意思整百
家之不齊亦庶幾以竭吾才故間命罔從而黃巾爲
害萍浮南北復歸鄉邦入此歲來已七十矣宿素衰
落仍有失誤案之禮典便合傳家今我告爾以老歸
爾以事將閑居以安性覃思以終業自非拜國君之

命問族親之憂展敬墳墓觀省野物胡嘗扶杖出門
乎家事大小汝一承之咨爾煢煢一夫曾無同生相
依曷求君子之道研鑽勿替敬慎威儀以近有德顯
譽成于僚友德行立於己志若致聲稱亦有榮於所
生可不深念耶可不深念耶吾雖無紱冕之緒亦有
讓爵之高自樂以論贊之功庶不遺後人羞凡某所
憤憤者徒以吾親墳壠未成所好羣書率皆腐弊不
得於禮堂寫定傳與後人日西方暮其可圖乎家今
差多於昔勤力務時無恤飢寒菲飲食薄衣服節夫
二者尚可令吾寡恨若忽忘不識亦已焉哉又年春
夢孔子告之曰起起今年歲在辰來年歲在巳既寤

以識合之。知命當終，有頃寢疾，享年七十有四。以其年六月卒，遺令薄葬。自郡守以下，嘗受業者，纒經赴會千餘人，迺葬於高密縣城西北一十五里礪阜山之原。嗚呼哀哉！有子益恩，孔融在北，景舉為孝廉，及融為黃巾所圍，遂赴難，隕身，有遺腹子。公以其手文，侶己名曰小同，精通六經，鄉人尊之。時為侍中，嘗詣司馬文王。文王有密疏，末之屏也，如廁還，問曰：卿見吾密疏乎？荅曰：不見。文王曰：「密我負卿，無卿負我，致鳩而卒，悲夫！自夫子沒後，大道方卷，公之網羅遺典，探賾今猶特立鬱然。時季途屯，志不苟變，全身遠害，猗歟美歟！及范曄曄作論有曰：王父豫章君，每考先儒

經訓，長於公，常以為仲尼之用，不能過也。及傳受生徒，專以鄭氏家注云：晉中興，戴逵字安道，以雞卵汁溲白瓦屑，為公作碑，手自書寫。文■語亦妙絕。年代古而碑闕，亡德音，負而詩書在，承節以萬歲通。天元年，奉勅於河南道訪察，觀風省俗，激濁揚清，行至州界，見高密父老云：鄭先生，漢代鴻儒，見無碑記，不以庸妄，遂託為文，往以會府務殷，無暇景歲序，遷貿執筆，無由。今者罷職含香，忝居分竹，屬以閑隙，乃加修撰，耆舊者惟聞其名，後生者不覩其事，今故尋源討本，握槩懷鉛，兼疏本傳之文，並序前言之目，發九泉之冥昧，播千載之■翦以繁華，不為雕飾。

文先成訖石又精磨碑未建而承節卒正議大夫使持節密州軍州事刺史上柱國鄭杳以開元十三年秋八月巡茲屬縣敬謁先宗欽承墳墓之閒籌度碑石之側公心至清不欲費■公性至靜不欲勞煩廼命參軍劉肫校理舊文規模新勒未閒肫又罷職仍令終事冬閏十二月公伺其歲隙因遣巡團便令建立惠而不費允協人神承節銘曰
煥乎人文圖籍典墳煩亂事翦定自孔君中途湮沒秦帝俱焚漢興儒教鄭氏超羣膏腴美地簪紱宏規嗇夫罷署京兆尋師中候乾象左氏韓詩雖稱積學殆若生知公之挺生大雅之懿囊括墳典精窮奧祕

六藝殊科五經通義小無不盡大無不備好學慕道深思遠慮來往周秦經過兗豫侍中不仕司農罷署盧植東遇馬融西去作者謂聖述者謂明躬違三辟門傳五更周官東部漢躡西京白玉遍地黃金滿籬占卜潛橋行途過沛陶謙師友孔融高蓋山啓賢扉草生書帶七十歸老三年赴會經傳洽熟齊魯攸宗爵祿不受贊論爲功禮樂今去吾道皆東類于標德比皓稱公闞尹擅貴禁錮連年乃逢宥罪方從舉賢南城避難東萊假田誕膺五百終覽八千今年在辰來年在巳嗚呼不憇于嗟到此勞我以生息我以死道該八索神交千祀濰水之曲礪阜之陽通德爲里

鄭公爲鄉雲愁廟古月暗墳荒舊碑先沒新石再彰
詞愧黃絹心淒白楊明於不朽終古騰芳 鄉貢
進士 安中書丹徵事郎前行密州高密縣主簿
兼管勾常平倉事 裔篆額 大金永安五年
歲次庚申三月一日勒成

大唐元氏縣令龐君清德之碑 唐 邵混之

我國家再訾山河重懸日月明罰飭法覈名實之故
典考績宣力甄象魏之舊章皇道煥炳而時乘帝載
緝熙而日用德惟善政政在養人若令長子男銅章
墨綬而尤善最者可屈指而知宣父中都太公灌邑
童恢責獸卓茂遷蝗男女別途鬼神息暴以今方古

君何讓焉君姓龐氏名履温字若水南安人也其先
齊逢伯陵之裔曾祖卿惲元勳佐命功臣第壹等左
武侯大將軍封國公食實封四百戶贈幽平燕易
嬀檀等六州諸軍事幽州刺史謚曰肅 歷數雖改雲
雷尚屯披荆棘者馮吳佐元功者蕭鄧將盟帶礪畫
象雲臺圖兼衛霍 案此借 爲霍字 之容仕遂漢光之願 曙庸
賞懋食邑論封祖同福并州大都督府司馬饒州刺
史左衛將軍安北都護外揆望殷銜珠寄重匪親不
捧非賢勿居阜蓋南臨尋振喬卿之譽紅旌口卷式
標鄭吉之能考承訓通事舍人鄭州司馬贊善大夫
率更令將作少監辭令抑揚綸鳳述旨題輿叶詠展

驥治中洪洞方樟允供於邦造激揚少彙贊裕於搖
山君純德天資大材靈降龍章龍彩凝脂點漆出忠
入孝遊藝依仁荒蕪四壁寥廓千丈代陪豐沛親預
葭莩翼鱗翰之口接風雲之會漢表有外戚恩澤周
詩有申伯渭陽起家補昭文生從勳閎也長安二年
明經擢第捧宣州參軍尋授莫州司功參軍事秩滿
丁二親憂痛瘁瑩枝哀酸鄰社往而不返杖而後行
縗禫一年甫從常調開元十九年春會府遂拜公爲
此縣令魯子臬之爲政禮變邠人漢原涉之舉能威
行谷口庶矣富矣又何加焉導之齊之非君莫可君
有善政者七風雹咸下於屬城樹稼獨滋於元氏其

政一也頃以陽光慙亢陰液乖旬苗慮騰興人或狼
顧公罄奠珪幣稽顙壇場俄而油雲四周膏雨百里
其政二也闢土蓄畬用丁分地勸東作而播稼課西
成之銓斂躬臨樹藝親載酒醪故使夏農服田秋得
其實其政三也詢知疾苦所患虛丁撫狀上陳應時
申削籍無口稅人獲息肩其政四也修職奉符不爲
進越下有鬱滯必掣肘諭言每課田租時臨調賦寬
爲口約曾無再輸其政五也此地俗多慳吝跼蹙彈
絃素曰難持案金石萃編云當是治避高宗諱更承
寬弛公整其銜策適其權豪輒去害羣悛心斂跡其
政六也先縣館宅湫漏與百姓雜居公薄責人傭先

抽已俸雖與慮始而可以樂成其政七也是以廉平
稱職西河知魯衛之風清儉當官南土變夷齊之俗
可大可久是謂賢人之德惟幾惟深以成天下之務
公儀如繪畫神若轉規聲以聞於震雷用無待於周
月惠如春露吏人不能窺喜愠之容結若冬冰貨殖
不能動首陽之行蓄霜鍾於絳府有感必通淒月鏡
於元臺觸形皆照邑老謝虔祐等並鄉庭積善掾吏
安排行義以達其道隱居以求其志相與族談城府
錯立康莊褒德匪舒宣風技癢或叫帝闈而抒美或
邀使駕而論功衆志口誠如寒附火於是圖徽翠珍
託懿金聲其詞曰

清風汎濫兮其來溥茂宰馳能兮超卓魯雞犬相聞
兮人安堵一同仰之兮如父母聽謳謠兮詢疾苦踰
屬城兮光趙部趙口遺風兮多慎忭君子爲之屏姦
僞化澆浮兮勗以義邑口口兮市無二政勝殘兮仍
博施如水火兮時不匱刻石鐫金兮遠傳懿直爲循
良兮守名器開元二十四年歲在困敦律中夾
鍾八日建前鹿泉縣令邵混之篋蔡有鄰書

續古文苑卷第十八

續古文苑卷第十九

賜進士及第授通奉大夫山東通省督糧道加三級孫星衍撰
碑志五

右拾遺陳公旌德碑

唐趙儋

大唐劍南東川節度觀察處置等使戶部尚書兼梓
州刺史兼御史大夫鮮于公為故右拾遺陳公建旌
德之碑。

公諱子昂字伯玉梓州射洪縣人也其先居於潁川
五世祖方慶好道得墨子五行祕書白虎七變隱於
郡武東山子孫因家焉生高祖湯湯為郡主簿湯生
曾祖通通早卒生祖辯為郡豪傑辯生元敬瑰偉倜

儻弱冠以豪俠聞屬鄉人阻飢一朝散粟萬斛以賑
貧者而不求報年二十二鄉貢明經擢第拜文林郎
屬青龍末天后居攝遂山棲餌木殆十八年元圖大
象無不達嘗學術擬張平子風鑒比郭林宗公卽文
林元子也英年過人彊學冠世詩可以諷筆可以削
人罕雙全我能兼有年二十四文明元年進士射策
高第其年高宗崩於洛陽宮靈駕將西歸於乾陵公
乃獻書闕下天后覽其書而壯之召見金華殿因言
伯王大畧君臣明道拜麟臺正字由是海內詞人靡
然向風乃謂司馬相如楊子雲復起於岷峨之間矣
秩滿補右衛曹每上疏言政事詞旨切直因而解罷

稍遷右拾遺屬契丹以營州叛建安郡王武攸宜親
總戎律特詔左補闕屬之迨及公叅謀幃幕軍次漁
陽前軍王孝傑等相次陷沒三軍震懼公乃進諫感
激忠義料敵決策請分麾下萬人以爲前驅奮不顧
身上報於建安建安復諫禮謝絕之但署以軍曹掌
記而已公知不合因登薊北樓感昔樂生燕昭之事
賦詩而流涕及軍罷以父年老表乞歸侍至數月文
林卒公至性純孝遂廬墓側杖而後起柴毀滅性天
下之人莫不傷歎年四十有二葬於射洪獨坐山有
詩十首入正聲集十卷著於代友人黃門侍郎范陽
盧藏用爲之序以爲文章道喪五百年得陳君焉由

是大中之詞紙貴天下矣有子二人並進士及第長
曰光官至膳部郎中商州刺史仲曰斐歷河東藍田
長安三尉卒官光有二子其長曰易甫監察御史次
曰簡甫殿中侍御史斐生三子長曰靈甫次曰競甫
衆甫皆守緒業有名於代劍南東川節度使兼御史
大夫梓州刺史鮮于公自受分閩之征也初年謀始
立法二年人富知教三年魯變於道乃謂幕賓曰陳
文林散粟萬斛以賑鄉人得非司城子罕貸而不書
乎拾遺之文四海之內家藏一本得非臧文仲立歿
而不朽乎於戲陳君道可以濟天下而命不通於天
下才可以致堯舜而運不合於堯舜悲夫昔孔文舉

爲鄭元署通德門蔡伯喈爲陳寔立太丘頌異代思
賢之意也況陳君顏閔之行管樂之材而守牧之臣
久闕旌表何哉爰命末學第敘豐碑表厥後來是則
是効其頌曰

有媯之後封於陳國根深苗長世載明德文林大器
質匪雕刻學術鉤深風鑒詣極代公耿光喬元藻識
施不求報退身自默岷峨降靈拾遺挺生氣總三象
秀發五行才同人室學匪獵精明明天后羣龍効庭
矯矯長離軒飛梁益封章屢抗矢陳刑辟匪君伊順
惟鱗是逆九德未行三命惟錫帝命建安遠征不伏
咨公幕畫騁此驥足惟王玩兵復諫違十忠言不納

前軍欲覆遂登薊樓冀寫我憂大運茫茫天地悠悠

沙麓氣衝大陰光流義士養微人誰造周嗟乎道不

清如何風樹不可謂遂放言於感遇亦阮公之詠盧墓之側柴毀滅性管輅之

才管輅之命惟國不幸非君之病我鮮于公中肅恭

懿光明不融為君頌德穆如清風日月運安江漢流

東不閉其文永昭文雄唐大曆六年歲次辛亥

十月癸丑湖日建前監察御史趙儋撰

大唐贈揚州大都督段府君神道碑銘并序

巨唐大曆己未歲春正月段府君之子四鎮北庭涇

原鄭穎等州節度使開府儀同三司御史大夫張掖

郡王曰秀實追琢貞石光昭先考展孝思旌休烈也

夫流濬者其源長德充者其後大更八姓而不膺五

福府君其人焉君諱行琛字行琛宗周柱史垂其裔

前漢都尉昌其業太尉之威懷戎落驃騎之光啓冀

方四燕兩魏高位碩德扶踈於史牒者向二百人以

至高門平原忠武王孝先弼亮北齊奄荒東夏恢武

經而抗衡西帝揆文教而師尹南宮曾門德濬初罹

否運播遷隴坻度地肯堂鬱為望姓在周辟奉朝請

入隋直文林館靖恭厥位獲沒先朝大父操握機宗

發早齡卽世考達從調夏官藝極龍豹致果為毅職

統熊羆皆保家之良主府君生知六行之美學究五

經之奧既齒鄉賦高標甲科簡脩獨耀於錦衣從事
仍屈於黃綬學有著位我實當之郡有子弟我實誨
之自隴及岐鼎新儒行雖東里子產西蜀文翁誠存
物應蓋未之比厥有成績聞於家邦厥名位而知止
賁丘園而用晦我國家雖右斷匈奴之臂時脩大刑
於絕漠之表旁求百夫之特永清萬里之外府君顧
謂子張掖王曰爾居能服勤性成惟孝出可承命遊
且有方虎穴不探龜組何獲爾之元昆介弟可以供
指使我先人遺業可以終餘齒忠不擇事安實敗
名因剛慈以激昂俾宣力以勤遠君子謂府君知愛
子之道矣王投筆占募馳驛徂征坐籌必勝之畧動

獲前禽之利泊王宦登通貴佐律副軍銀章已緇玉
關未入府君溫其在邑樂且有儀九流百氏經耳輒
誦四憂十義因心必達然猶深居自珍與物爲春希
言中倫知機其神內葆光以恬真外行簡以依仁子
獲奉親之祿欲養而不待身寄有涯之生遷化而無
愬天寶九載夏之季序邁疾于汧陽御史里之第乙
酉奄歸無物其季於斯七十五稔夫人樂平狄氏吳
山縣丞哲第六之女心婉志柔靜專動直承筐而繁
衍其實主奠而敬恭無忒下壽初登先時永逝門子
祥穎仲子秀成季子同穎等柴立長號稽謀宅兆明
年春孟序辛亥遷皇祖及諸父之無後者偕葬於隴

山東麓柏谷掌次列三墳周施一域送終之禮備矣
屬歲旅天朔塵驚薊門微會沙場之右殄殲鐵額之
醜王飛郵及國擗地崩心夷凶難遂於情禮哭墓復
隨於軍正既清海裔又牧回中一莅疲人荐彰丕績
廣德二年秋九月乙未詔追贈府君祕書省著作郎
夫人太原縣太君恩深歿後之寵慶表生前之訓上
又以王翊亮三節緩御七戎致位崇獨坐之班成軍
雪多壘之恥大曆十年夏五月詔加贈府君婺州刺
史夫人太原郡太夫人十一年冬舊使尚書左僕射
扶風郡王馬璘邁疾弥留表王請貞師律詔仍遷御
史大夫既操二重之權克施五利之策平涼安定曲

荷其亭育先零罕开遙服其威信四封無聳三務有
成十三年五月命朝丹禁面疆戎索帝曰朕翁孫也
俾寫真麟閣橐籥而遣焉及季夏壬寅又贈府君揚
州大都督夫人忻國太夫人榮親揚名二美兼著傳
曰子之能仕父教之忠詩曰維其有之是以似之見
於府君矣雖封植無改而銘頌未刊過聽謬採于芻
蕘脩詞愧陳于質要銘曰
於穆端士神所勞矣貞惠資身義方訓子育德無倦
狗名知止宜其後昆式是繁祉繁祉伊何後昆則然
西服戎胡東定幽燕殊勩克著湛恩上延贈光三錫
慶洽重泉熊軾增寵牛崗啓繇北控沂源西馮隴岫

列瑩如始紀石增舊淑德清規終天永茂
十四年閏五月庚午朔十三日壬午建朝請郎檢校
尚書刑部員外郎兼鳳翔少尹侍御史賜緋魚袋張
增書朝議郎行鳳翔府天興縣尉李同系篆額
大愿

故莫州長豐縣令李君墓誌銘

唐貞元三祀五月故長豐宰李君丕卒於幽州潞縣
嗚呼逝水古今悲夫公隴西人也世襲軒裳地清才
幹曾祖知禮宣州司功參軍祖懷璧汴州陳留縣丞
考口許州陽陵縣令公洒然深心抱義育德士林咸
器重之乃昌言薦於元戎遂徵辟為潞縣丞佐理高
標令名遠著後墨綬長豐化百里之風樂四人之業

俄改任莫州司法參軍蘇息萌隸鈴鍵姦譎凡登仕
踐位時議茂宰良掾也每處其厚不居其華果行溫
良發言砥厲豈期餘慶罔祐而禍兮有階故鵬鳥作
孽二豎為祟沉疾於故林私第卽代之日春秋六十
有三無嗣夫人元氏晝哭靈帳恨無三從傷肝膈之
痿憤痛終身之惇獨長女適河東柳氏名峴試太常
寺奉禮郎感深仁之厚恩盡半子之禮節力窆棺櫬
手植松楸扶塗車封馬鬣粵三年建子月葬於縣之
南三里潞水之右託一片之琬琰紀平生之微獻俾
山壑之變風烈有遺而為銘曰
屹然孤墳長城之東死生永隔天地不同吁嗟英靈

窮泉之中悄悄原野且暮悲風

石在通州文昌殿壁
近年出土見州志

唐吳郡張常洵紀孝行銘碑

唐口孚

君名常洵字巨川句曲人也其先奕世載德賜姓受
氏詳乎家牒炳乎國史矣在昔宣王時則有若張仲
孝友周人美之列於風雅在悼公時則有若張老恢
晉國之圖拯魏氏之急魯史嘉之編於載冊高祖伯
卿曾祖克紹並怡情墳典抗志不仕祖處靜皇湖州
烏程縣令考璋皇建州司戶君即建州之第四子也
幼而聰明長而岐嶷窮百行之源事父母以孝稟五
常之性奉親族以和及父母既歿居憂泣血柴毀骨
立躬自建冢高數尋手植奇樹盈千餘本然志戀墳

塋終身洒掃雖喪紀踰制而靡釋衰絰乃葺結庵居
於墓次哀動行路感通神明白鶴翔於林中靈芝生
於墓側鄉黨稱其孝郡邑嘉其行錄表上聞優詔允
答復其徭役旌其倚廬三紀於茲情猶一日居嘗疾
困殆不勝喪勺飲不入口者累日矣其兄常泳勸令
飲食堅執不從兄謂之曰有疾飲酒食肉在禮自有
明文蓋無以死傷生也今汝異居幽荒之際而即安
於疾殆至滅性又焉得為孝乎乃曰吾負終身之憂
匪惟一日之戚且吾有兄不患死之將至兄有子不
患祀之將乏身既不賴其生口豈復食其味乎君子
曰甚哉張氏兄弟孝友之至也非令弟無以知兄之

賢非仁兄無以成弟之美所及其遠哉上以彰聖朝
孝禮之至中以表牧宰教化之極下以明張君錫類
之永此一行也而三善成焉乎雖庸愚備知盛美竊
以寵錫之命雖口行於門閭紀述之詞曾未標於篆
刻敢直書其事識之貞石焉銘曰

天錫嘉命保佑我唐篤生張君令名是揚令名伊何
純孝克彰終身在戚執親之喪獨居幽荒廬墓之側
喪制既踰哀情罔極衰經弗離甘旨靡食疾苦嬰身
志行不忒節彼高墳巍然如崗草木呈瑞鸞鶴表祥
孝感之至達於聖皇詔命旌美殊其井疆勒名紀行
於門之旁千秋萬祀斯風不忘集古錄有唐孝子張

磨滅僅可見其髮髯注貞元五年考孝子父建中四
年癸酉歿廬墓六年以明年貞元五年己巳立此碑
也別有咸通十三年碑在句容張氏義臺得其殘
石一片後有潤州句容縣令呂惟及咸通十口等字
寶刻類編載張府君旌表碑唐王承福書雷珍題額
咸通十三年引諸道石刻錄即其碑也今張氏之裔
棄于階下自余拓本以存故迹惜不得其全文併載
於此碑所謂節彼高墳者今在義臺西北後人不知
是張氏父冢處指為古冢又為街道
民居隔絕僅以廬墓處為孝子祠耳

周氏墓誌銘

唐王紳

夫人姓周氏其先汝南人也爰自炎漢達於有唐縣
歷衣冠其來尚矣曾王父府君珪皇承務郎勅授薊
州三河縣令王大父府君歸皇宣德郎試左贊善大
夫賞緋魚袋兼上柱國王父君彥皇彭城郡高望府
折衝賞緋魚袋兼上柱國皆業崇儒行世繼簪組閭

次門慶逾長夫人則折衝府君之長女幼年貞柔至性純孝凜乎正氣賢行自天雅量絕儔風見難並適佐君子令淑尤彰雍睦承家母儀增書是以儉恭聞惠和不以鉛粉益容但以禮節資德時貞元辛巳歲寢疾於莫亭集賢里之私第伏枕逾月醫無所為以其年五月十三日奄從於化享年四十八嗚呼天命數盡生也有涯哀哉哲人何不為壽瑤琴絕聽寶鏡休窺珍玩滿室莫之能守親戚彌切痛無偕老之期岐路感傷嗟有懷仁之德以其年冬十一月八日卜兆於鄭城東南二十五里世業平原之禮也案盧文堂文集有天寶六年載唐故義興周夫人墓誌銘跋曰誌後云以茲古晨赴杜城東郊之禮也余初疑句有

脫字及觀大憲間光祿卿王訓墓誌亦云遷厝萬年縣達水鄉達水原之禮也則當時自有此文法此碑云亦與雲結長川風悲草樹嗣子操次子摸並殘骸毀容能竭孝道慮恐陵谷將變歲序將遷刊石紀時其銘曰

郡城東南兮滹水湄歲往月來兮無盡期明明寒月兮對孤壠蕭蕭白楊兮悲風吹

唐莫州唐興軍都虞候兼押衙試鴻臚卿鄭府君墓誌銘

府君諱玉字廷玉本滎陽人也其先因官得地曾祖亮皇莫州司馬祖備涇州四門府折衝王父泰遊擊將軍守左武衛大將軍試太常卿咸以文武兼才應

當時之選府君鄉舉孝廉弱冠從事有救世之才軍
府推稱以政狀聞於本道時表奏授宣義郎試恒王
府司馬權充本州孔目判官吏不敢欺人樂其業時
歲儉人飢多盜世亂思理須得其人遂屈充唐興軍
左虞候以屏盜賊擒奸摘伏撫弱遏強并邑肅然論
功授秩累有拜遷官至鴻臚卿職竟都虞候自口主
局向三十年閭里懷其仁鄉黨服其義犬不夜吠衣
錦晝行水鏡居心不假灰猪以辨偽臨事明斷有同
跪鼠以懲愆衆稱才用無窮又拜牙門將內外瞻矚
文武繩準洎貞元十七年旌麾撫臨錄侯掩之錫重
始終之節賞衣一襲錫馬一匹以其州在關外賴之

襟帶委以守禦無遷易也鄉人改觀閭里拭目昂昂
乎固一時之傑也豈期二豎爲災奪人之願以貞元
十八年十二月十九日寢疾終於鄭亭春秋六十有
八邑悲巷哭春不相杵夫人河間邢氏以貞元二年
三月四日先府君捐世享年四十有八銀青光祿大
夫檢校太子詹事殿中侍御史讓之孫平昌縣令際
之女適配君子義不失於三從奉事舅姑禮乃全於
四德爲六親軌範作三族楷模得女適人而宜室生
男至孝以承家皆夫人餘慶之所鍾府君義方之所
教也嗣子惟興等痛乎松楸未樹歲月遄臻先遠有
期不敢違上奉以貞元十九年歲次癸未十一月戊

寅朔十三日庚寅耐於州城南二十五里顧義鄉三方之原禮也是日也素車隨紼白馬臨棺雲慘寒天風悲野樹恐陵谷變遷銘以誌之辭曰平原四顧兮塚壘壘左枕故園兮右滹水嗚呼鄭君兮來宅此白楊蕭蕭兮莫風起何嗟原夜兮口口口自有明珠兮照千里

清河張府君墓誌銘

唐柳宗元

貞元二十年六月一日清河張公諱曾寢疾卽世於莫亭嘉深里之私第享年七十六自屬纊至於移窆朋從親暱口州里士君子無不慟但嗚呼仁賢之云亡也哉惟公受姓口黃而分歷代茂盛源流益別公

卽清河之緒曾祖皇太子諮議口諱崇祖皇中府折衝諱操父皇太子內直郎諱口口卽內直郎嗣也早歲有節克壯口心拳拳禮容執口一無倦逮夫弱冠遵道秉義汪汪然不可得而親不可得而友挺出常度機畧內蘊時薊州刺史御史中丞榮公口口公才最以從事情以道契三揖而進受靜塞軍營田判官恭儉蒞職勲績明著甄錄奏聞受遊擊將軍守右領軍衛幽州開福府折衝都尉員外置同正員賜騎都尉公疎勢賊諂心不苟合口恬淡爲曠年之用視簪組爲伐性之具遂辭名晦跡高卧雲物因家於三河邑背郭而東得林巒之勝致也暨乎年逾不惑以長子

瓊佐鄭亭候嘉聲洋洋多歷年數由是閱實觀政巾
車以來郡邑清暢禮容大備口釋我願斯不返駕每
口道人貞士談真空微妙之性探口原迷頤之旨浩
浩方寸洞豁塵境不其致歎嗟乎大道無涯天命有
定雖聖明不能越常運而超物外哉公以疾起無妄
情不嗜藥顛顛居易悔咎莫有星歲幾同大漸長往
嗚呼天富其道而闕於壽謂之何哉夫人北平田氏
口而得禮有子二人瓊等十耐先塋龜筮告吉以其
年十一月一日窆於任上東北長上鄉原禮也二嗣
號擗痛深泣血哀告以先遠有期請以誌之宗元承
命不忤刻之貞石銘曰

蘭茝其馨金玉其貞碎而折之何神不明茂旌其英
德立行成悠悠銘旌洋洋懿聲孝子令孫宅兆郊原
龜筮叶從慶流後昆

人謂今其碑石尚存
長豐寺陷置壁間

唐故朝議郎檢校尚書戶部郎中兼襄州別駕
上柱國韓昶自為墓誌銘

并序

昌黎韓昶字有之傳在國史生徐之符離小名曰符
幼而就學性寡言笑不為兒戲不能聞記書至年長
不能通誦得三五百字為同學所笑至六七歲未解
把筆書字卽是性好文字出言成文不同他人所為
張籍竒之為授詩時年十餘歲日通一卷籍大竒之

試授諸童皆不及之能以所聞曲問其義籍往往不能答受詩未通兩三卷便自爲詩及年十一二樊宗師大奇之宗師文學爲人之師文體與常人不同昶讀慕之一旦爲文宗師大奇其文中字或出於經史之外樊讀不能通稍長愛進士及第見進士所爲之文與樊不同遂改體就之欲中其彙年至二十五及第釋褐柳公公綽鎮邠辟之試文館校書郎相國竇公易直辟爲襄州從事校書如前旋除高陵尉集賢殿校理又遷度支監察拜左拾遺好直言一日上疏或過二三文字之體與同官異文宗皇帝大用其言不通人事氣直不樂者或終年不與之語因與俗

乖不得官相國牛公僧孺鎮襄陽以殿中加支使旋拜祕書省著作郎遷國子博士因久寄襄陽以祿養爲便除別駕檢校禮部郎中丁艱服除再授襄陽別駕檢校戶部郎中大中九年六月三日寢疾八日終于任年五十七其年十二月十五日葬孟州河陽縣尹村娶京兆韋放女有男五人曰緯前復州叅軍次曰綰曰緄曰綺曰紉舉進士女四人曰茱曰谿曰當曰著在室曾祖叡素朝散大夫桂州長史祖仲卿祕書省祕書郎贈尚書左僕射父愈吏部侍郎贈禮部尚書諡曰文公銘曰
噫韓子噫韓子世以昧昧爲賢而白黑分衆以委委

爲道而曲直辨生有志而卒不能就豈命也夫豈命也夫

孤子縮書并篆

唐故滎陽鄭府君夫人博陵崔氏合祔墓誌銘

并序

唐秦貫

鄭之先自周王封舅之地因而氏焉別派五流深源一至是以滎陽之望得爲首冠其下公侯接武台衡繼迹雕軒繡軸之榮羽蓋朱轡之盛由魯史記迄於唐春秋實鄭氏爲衣冠之泉藪也高祖世斌皇左司郎中磁隰二州刺史新鄭縣開國男食邑三百戶曾祖元嘉皇新都長水縣令襲封新鄭縣開國男祖有常皇吏部常選襲爵新鄭縣開國男烈考探賢皇衛

州昌樂朝城莘縣令府君諱遇字□□皇試太常寺協律郎文業著於當時禮義飾於儒行少有僮僕之志長負環竒之名不苟譽以求容每親仁以竭愛爲中外模範成友朋宗師樂善孜孜不愠知鮮量苞江瀆氣合風雲今之古人人雖上出神不優德配壽胡差先夫人之亡益世一霜也享年六十夫人博陵崔氏令門清族慶餘承善四德兼備六親雍和仁讓得於天真慈惠立於素尚母儀內則動靜可師禮行詩風進止成法雖婕妤女史大家經教承之於諷習推之於行源者亦異代殊人其歸一旨未亡之歎孀齡杳然玉没何先蘭然遽至以大中九年正月十七日

病終於淇隩之私第享年七十有六以大中十二年
二月廿七日合祔於先塋之側其鄉里原隰之号載
於舊記此闕而不書女一人適范陽盧損之嗣子六
人長曰頊攝汲縣丞知縣事早亡次曰珮早亡次曰
瑾次曰玘次曰璩次曰琬咸繼以遺芳克修至行銜
哀茹毒追攀罔極將營護口窆泣告於業文者爲之
銘云
仕門雙美兮令德咸芳甲族齊茂兮英華克彰允文
武兮書劍名揚蘊儀度兮閨門警長珠沈玉沒兮人
誰靡傷桂殞蘭凋兮共泣摧香垂修名兮允謂不亡
傳事盛兮多載彌光聽悲風兮松韻連崗刻貞石兮

永志元堂

給事郎試太常寺奉禮郎攝衛州司

法參軍秦貫撰

又一碑鄭遇作鄭
恒疑後人所改

後魏洛州刺史侍中兼太師昌黎馮王新廟碑

唐馮元德

王諱熙字晉國冀州長樂人也伯祖諱跋建國北燕
傳位於昭成皇帝諱宏卽王之烈祖也魏太武帝滅
北燕徙其家屬於代王以帝者子孫遂交婚於魏室
魏文成帝納王妹爲后卽文明太后是也王尚博陵
長公主以敦慎博愛厯事三朝累拜冠軍將軍侍中
中書監太傅太師之任進爵昌黎王及魏孝文帝卽
位前後娶王三女且二爲后一爲昭儀文明太后臨

朝王以師傅之重寵極禁壺內不自安求外任爲洛州刺史侍中太師如故洛陽經永嘉大亂之後宮寺毀廢王爲政仁恕而酷信釋教凡出俸祿於諸州鎮建佛圖精舍合七十二處今之廟地舊建北邙寺乃其一也今佛圖基址尚存其寺碑文中書侍郎賈元壽所製孝文每登寺讀碑嘉歎不已後徵歸代遇疾而薨屬遷居洛京遽詔有司爲辨喪事公主先薨命開其墓併二柩俱向伊洛皇太子赴代迎弔將葬贈假黃鉞侍中督十州諸軍事大司馬太尉冀州刺史加黃屋左纁備九錫前後羽葆鼓吹有司奏謚曰武孝文爲撰誌銘縗服親臨墓所以前魏書備載其事

但不言封樹之處及廟立之由墓與廟當不相遠也其廟豈州人思王之德衆所建乎不然寺沙門所置也至今爲洛北之望祀年代寢遠雖牲牢日享而室壁侈頽大中六年六月洛之豪族孟州長史焦宗美特捨家財大新厥宇兵衛儼列廟貌益崇愚別墅寄温谷川東走十里直王之廟每見遠近里社坎鼓啾管以趨之及問王之名位爵邑皆失其傳乃乘暇謁拜碑板堙滅莫識何從退尋家牒考於魏史是知卽愚之十二代祖也伏念甘棠勿翦邵德實思若非績化深洽民心卽何能五百年之後而血祀不絕乎恐盛烈沈翳無復彰明不敢多文遂斲石重紀

唐咸通八年歲次丁亥十一月壬子九日甲辰刻十
二代孫鄉貢進士元德述弟進士元度篆額弟進士
元錫書十二代孫元規元貺元範元質元靜并前八
人同建立孫璋鐫

唐故左拾遺魯國孔府君墓誌銘

并序

唐鄭仁表

咸通十五年三月侍講學士右僕射太常孔公以疾
辭內署職其元子左拾遺養疾亦病逾二旬太常公
病少閒拾遺疾亦閒又旬日太常公薨拾遺哭無時
後七十六日亦終嗚呼求諸古未聞也仁表與拾遺
同歲爲東府鄉薦策第不中等再罷去明年偕宴於

東堂宴之日博陵崔公薨出紫微直觀風甘棠下表
爲支使校芸閣書拾遺始及第乞假拜慶新進士得
意歸去多不伏拘束假限往往關試不悉集貢曹久
未畢公事故地遠迨二千里例不給告時僕射太常
公節制天平軍以是勤不得請拾遺曰人之多言必
以我爲宴安訖春不宴年少乘喜氣赤春頭竟不對
狎客持一盃酒人以爲難關試日都堂中捐別同年
徑出青門外經所爲從事州入院判案十日東去府
適罷賢諸侯爭走羔鴈馳弓旌竟不能致徵爲渭南
尉直宏文館久之會大學士出將去聲竟不就僕射太
常公罷鎮居洛中拾遺伏安定省不嘗言仕宦旋以

萬年尉復怙文職無西笑意僕射徵拜司戎貳卿拾遺由侍行乃赴職越一月今許昌太傅相國襄陽公爲河中奏署觀察判官假監察御史故事赤尉從相府得朱紱殿中公昆仲閒有未至者求裏行官不改服色人人美譚之俄轉節度判官從知之道皎然明白和而不柔守而通內盡匡補而外若不知相君待之異禮俄拜左拾遺內供奉嗚呼止於是何也春秋始卅三矣惜哉公至性自生知雖欲全其禮傳於後開強忍抑不能俯就始得疾不言於人因哺哭若絕左右始知有病句甚矣卧堊室中不復進饋飢疾益亟方官歸常所居舍悉召骨肉追僕使唯言僕射

公葬時事指揮制度必以古禮戒誨約束委曲備悉左右皆泣公曰吾平生無纖小不是事天報我甚厚使亟得歸侍地下尔盍賀而返以泣耶吾自遂性不能無傷生全大孝送終設祀宜益儉削無以金鉛織華爲殉無以不時之服爲殉吾幼苦學尤嗜左氏傳所習本多自讎理宜置吾左右友人鄭休範多知我所執守相視若親弟兄我亦常以所爲悉道之請以誌我彼不能文必盡其實言竟撫弟妹若將千百里爲別者視妻子若將一兩夕不面者而怡然其容如有失而復得已而終嗚呼其喜歸侍乎公謝世之月餘日前與二季處閤室中忽援毫書廿八字于室內

東辰之上若隱語而加韻焉曰許下無言奪少年震而不雨月當弦風濤渭逆餘艘沒從此無舟濟大川初玉季載考其義莫究指歸既痛絕手足若洗然而悟曰許無言是午字今歲在午也震不雨是辰字其哀瘵至甚移歸院就醫是辰日及奄然之日驗於官慙是上弦日又應月當弦之識也吁似有所潛受於冥昧閒何懸知之若是也憶於洛陽里第始相與定交公曰何以契我余曰死患難先祿位託孤寄命同休共感此義交也見善相勉也見利相遠也言之而必行守之而必固一旦離此則攻而絕之使處世爲正人沒身無怨言斯益友也余將與吾子契之自

是過必相攻善必相激相成如恐失相畏若臨敵雖朝夕共行止人不以爲朋比亦君子之能賢善誘也嗚呼公之文之學之精明道行如雷聲日光無耳目者則不知也公之計始聞人人如有亡碩生鉅賢心死氣脫道之不行也天何心焉公諱紆字持卿魯司寇四十四代孫繼繼承承世濟不墜閒生傑出磊落相望曾祖岑父皇任祕書省著作佐郎贈司空祖戮皇任禮部尚書致仕贈司徒父溫裕皇任檢校右僕射兼太常卿充翰林侍講學士冊贈司空皇妣河東薛氏族大而顯先司空公廿八年卽世公娶京兆韋氏山東清甲家也有二子男曰鐵婢始十歲甚肖似憶

與公約生子命名必如兄弟愚之子曰後魯他日鐵
婢當以還魯字之易云積善之家必有餘慶善之教
必闡於道儒釋釋固無嗣皇家公家道儒之餘慶也
公又賢而無祿其後益大以昌女少於男銘曰
嗟嗟夫君嗟嗟夫君孔聖遺允顏回後身高高者天
幽幽者神幽幽不見高高不聞不見不聞又何足以
云云鎮海軍節度掌書記將仕郎殿中侍御史
內供奉賜緋魚袋鄭仁表撰并書仁表以門閥文章
自高曰天瑞有五色雲人瑞有鄭仁表選家多未載
其文此碑是其撰文書石文既不佳字亦如常存之
以質後人知誇大之過情也碑中有旁注云去聲又
復見下旁注亦前人未有之體餘唯杜順和尚行記
胡旬反耳注

唐故清河郡張氏夫人墓誌銘 唐孫 珣
噫夫人姓張氏其淑慎貞素稟自生知退讓儉遜不
從於訓祇奉晨夕終始若一吁言乎不豫葬我私室
蘭摧春霧蓮墜秋風隙影難迴逝波不返男一人高
姐電影未分槿花已落女二人長曰奴哥穠花未開
嚴霜暗墮次曰郭兒卯髮未摠繼我門嗣夫人年四
十有三以景福元年冬十二月二十日卜兆於府城
之南雲門之下樹丘隴而銘銘曰
日月有度兮生死無常白晝其速兮元夜何長澗水
為鄰兮雲門是鄉千年万祀兮春露秋霜 夫樂
安郡孫珣述

時景福元年歲次壬子十二月辛未朔二十日庚寅
孫珣紀

陳公神廟碑

唐齊光義

在昔隋氏喪君齊人乏主代厄淪胥我大將運匡救
之謀先州里之義存乎蔽捍用何昭蘇初志未躋良
圖奄墜災生福始遺恨如何公諱杲仁字世威誕受
丕祉其昌來裔有媯之後人莫與京洪惟發靈乃降
時傑鼎角匿犀之異雄深魁武之姿貫藝造奇無所
不至立能事於艱虞之際建殊蹤於混亂之秋韞義
生風鼓動流俗全吳之地幸賴以安招定鄰邦輯國
徒旅江湖嚮應懷赴如歸沈法興率衆而來假我鼻

息初規景附末肆傾夷因何匪仁暴戾斯甚自遺覆
敗竟取淪亡至於敘官遊歷系業事咸不朽跡著無
方名與日月輪迴功隨載籍舒卷已詳於宣法師所
製寺碑若乃生志未盡餘勇仍存息氣沴於疢癘降
精靈於巫覡物靜裁異時無天昏人到於今罔不懷
德每以公之諱日爰伸仲夏之中展祀建齋所在充
遍雖掃地以祭且貴慤誠而廟宇未崇國昭節敬邑
老慶州都督府永清府左果毅都尉上柱國賜緋魚
袋張智景與福業寺長老義先等聚族而謀發言同
人不召而萃邑中之衆實慰我心疇其經營委以財
物始則運思而斲之丁丁終於用成而新廟奕奕座

盈神氣侍列鬼雄威深沈以肅然狀煜爚而疑動有以底明祇之位有以昭介社之儀及夫沐蘭湯奠椒醕揚枹拊鼓緩節安歌華彩服與瓊芳會陳巫與楚舞求非曲禱祀必正辭無紛若之言致馨香之信由是上感宸心旁追祀典降中使被懷濡聖澤覃溥天光照爛豈秦祠漢享之類可得同乎浹逮下之祈演無疆之助或飲食有訟或契文不明凡百無良深衷莫辨微見誠請立彰其效負者乃凶竟貽潛隱攘諍掩息望境自清比夏積憊陽秋淫霖雨捨我穡事妨於農收至於三至於四時其賢守李公行穆民勤郵之意傍徨匪⑤率領官屬長史李公昌岨司馬丘公

從心晉陵縣令岑公况武進縣令何公據等果至虔誠景刻俱應澤及千里無所不周使君涵道德之尊豐惠和之厚艱難之辰晏然無事豈不以忠信於物而昭明於神乎本宰何公學以入政優于子人深撫育之恩流清白之稱咸思善貺冀答⑥慈神之聽之庶同景福今餘寇未⑦尚煩剪滅神而助順靈其運乎昔者聖王之制禮能禦大災能捍大患以勞定國以死勤人則所必祀而明德報功大將生為司徒足以主世地歿為貴神足以鎮邪惡閭閻綏祐存亡以之斯所以榮尊故鄉廟食舊國宜矣勒懿跡篆豐珉延光表美⑧可闕歟光又策名清時亞位書府宦遊

日久遲暮言歸竊井邑之譽。忝文章之目。魯無君子。斯焉取斯。以為傳芳金石。不可妄也。郡司錄裴公導。翰林之寶。辭推典麗。請以頌記其銘。此君為之。文曰。烈烈司徒。為王爪士。勇冠諸軍。義先州里。三綱砥節。百行推美。所謂伊人。南國之紀。天厭火德。運歸黃祚。肇闢乾關。未康國步。鯨鯢振海。楔窳交路。偃草江干。惟夫子故。矛鎚挺擊。萬里長城。旌旄血灑。劍鏑風生。夸者貨首。同焉盜明。雄心不竭。終古英靈。依然甲第。尚想陳跡。庭變金地。祠開瑤席。曰雨曰霽。推誠邦伯。案咸寧昆陵志碑碣門云司徒神廟碑乾符三年集賢院學士齊光又撰據此知碑原有年月名街武進縣志未載無以補全也又案銘詞每段四韻而末段跡席伯僅三韻亦不完蓋以下皆脫去矣

續苑十州

三

大唐威武軍節度福建管内觀察處置三司發
運等使特進揀拔太保同中書門下平章事
使持節都督福州諸軍事兼福州刺史上柱
國琅邪郡王食邑四千戶食實封壹百戶王
審知德政碑銘
唐于兢

粵自範金合土之制。雲師火紀之名。禹別九州。堯咨
四嶽。莫不東求良輔。濟兆人。彰克勤克儉之能。垂
可久可大之業。嗣大叔寬猛之政。循仲尼富庶之言。
既茂勲勞。宜標篆刻。公名審知。姓王氏。瑯琊人也。其
胙土命氏。疏源演派。代濟其美。史不絕書。後以太祖
就祿光州。因家於是。郡焉。曾祖友。贈光祿卿。王父蘊。

續苑十州

三

玉贈祕書少監父恁贈光州刺史繼贈太尉公卽太尉之季子也初公兄潮志尚謙恭譽藹鄉曲善於和衆士多歸之福建節度使陳巖旣嚮其名又以所屬泉州求牧乃遣禮而請之及到任頗著嘉聲後巖在軍病甚不能視事軍士等懼無統御皆願有所依從泉牧遂以郡委於仲弟審邦而與公偕赴至則積惡者屏去爲善者獲安因詔授節度使累加檢校右僕射於是剗其訛弊整其章條三軍無譁萬姓有奉乾_○三年僕射邁疾且付公以戎旅仍具表奏尋加刑部尚書威武軍留後俄授金紫光祿大夫右僕射本軍節度使公器局端雅識理融明稟崧嶠之眞精得

圮橋之妙畧及膺帝命寵陟齋壇細柳連營旌旗動色蒲盧蒞政草樹逢春一年而足食足兵再歲而知禮知義方隅之內仰止攸同曩以運屬艱虞人罹昏墊農夫釋耒工女下機公旣統藩垣勵精爲理強者抑而弱者撫老者安而少者懷使之以時齊之以禮故得汗萊盡闢雞犬相聞時和年豐家給人足版圖旣倍并賦孔殷處以由庚取之盍徹夫述職之道底貢爲先九丘爰序於厥苞伍伯是徵於縮酒雖甸服之近江漢之中或遇阻艱亦絕輸賦惟公益堅尊獎慎守規程松柏後凋風雨如晦地征旁午天庫充盈共仰勤劬咸知匡戴常以學校之設是爲教化之原

乃令誘掖童蒙興行敬讓幼已佩於師訓長皆寘於國庠俊造相望廉秀特盛閩川以南地惟設險人尚爭雄或因饑饉荐臻或以刻剝爲苦萑苻易聚巢穴難探公感之以恩緩之以德且曰吏寔爲虐爾復何辜示以寬仁俾之柔服遂使數十年之氛祲遽致廓清一千里之封疆旋觀昭泰張綱以單車入壘虞詡用絳縷擒姦以古況今彼猶懷愧爰自天寶艱難之後經費實繁聚斂之臣名額滋廣卽山鳩利任土庀財峻設隄防頗聞賙贍洎纏烽燧仍患崎嶇三司之職務空存四海之輪蹄鮮至公按其程課令以權衡盡叶舊規尤彰宏業而又奉大雄之教崇上善之因

象法重興導師如在虹梁雕栱重新忉利之宮鈿軸牙籤更演毘尼之藏而又盛興寶塔多捨淨財日麗飛薨霞攢彩檻頊豔迴向遠邇歸依用俾羣緣皆同妙果佛齊國雖同臨照靡襲冠裳舟車罕通琛賚罔獻者亦逾滄海來集鴻臚此乃公示以中孚致其內附雖云異類亦慕華風宛土龍媒獨稱於往史條支雀卵諒可繼於前聞自燎熾西秦烟飛東觀魯壁之遺編莫掇周陵之墜簡存亟命訪尋精於繕寫遠貢劉歆之閣不假陳農之求次第籤題森羅卷軸夫四鄰共守蓋當偃草之期七德方修必假禦衝之備是以恢張制度固護基扃程功而莫匪子來作

事而適當農隙立崇墉之百雉表巨屏於一方巖邑
湯池曾何足數折筮縈帶固不可憑未若暫勞致茲
永逸兵戈荐起帑庾多虛凡列土疆悉重征稅商旅
以之而壅滯工賈以之而殫貧公則盡去繁苛縱其
交易關譏鄜市匪絕往來衡麓舟鮫皆除守禦故得
填郊溢郭擊鼓摩肩竟敦廉讓之風驟覩樂康之俗
閩越之境江海通津帆檣蕩漾以隨波篙楫崩騰而
激水途經巨浸山號黃崎怪石驚濤覆舟害物公乃
具馨香黍稷薦祀神祇有感必通其應如響祭罷一
夕震雷暴雨若有冥助達旦則移其艱險別注平流
雖畫鷁爭馳而長鯨弭浪遠近聞而異之優詔獎飾

乃以公之德化所及賜名其水爲甘棠港神曰顯靈
侯與夫召神人以鞭石驅力士以鑿山不同年而語
矣於戲辨貞金於大冶認勁草於疾風不有良臣誰
康澤國尋就加平章事檢校右僕射如故腰懸相印
手握兵符益壯軍聲弥新殊渥又改光祿大夫檢校
司空轉特進檢校司徒然而物議輿詞功厚賞薄以
爲爵祿未稱疇庸於是異姓分封仍加并邑轉檢校
太保瑯琊郡王食邑四千戶食實封壹百戶公之仲
兄審邽自守泉郡一紀於茲黠馬皆調疲人盡泰公
性惟雍睦氣稟溫和睦契墳簞政侔魯衛可謂高明
輝映超絕一時者也公以天下兵馬元帥太尉中書

令梁王勳格穹昊德服華夷奉大國之歡盟爲列藩
之表率今節度都押衙程贊及軍州將吏百姓耆老
等久懷化育願紀功庸列狀上聞請議刊勒元帥梁
王以公如河誓著匪石情堅累貢表章顯陳保證朝
廷冀宏誘勸特示褒揚將建龜趺合徵鴻藻競謬居
清列曾之雄文頃歲常詠皇華往宣宸旨已於視聽
親飫微猷今之執簡濡毫得以研精覃思備陳懿績
實無媿詞乃作銘曰
日月麗天舟楫濟川內外克乂股肱惟賢淮水長清
緜嶺方盛慶隨祚遠材爲時生伯氏雄特泉人仰德
求瘼斯勤頒條有則冠軍被疾付以師律政教翕張

士庶盛謐懿彼閩越帥實英傑地列周封心馳魏闕
聖澤汪洋元戎啓行有典有則爲龍爲光高懸秦鏡
理道自靜比屋懷仁連營稟令航海梯山貢奉循環
務其輸委毋憚險艱周征之術公田什一約以有程
守而勿失輕徭薄賦謳歌載路高掩龔黃遐追召杜
鄉校皆遊童蒙來求雅道靡靡儒風優優惟虺吹毒
久依山谷罔恣陸梁竟忻柔服法寶梵宇勝因所主
崇構斯精福慶攸聚佛齊之國緩之以德架浪自東
驅山拱北墜簡遺編繕寫精研麟臺矗爾武觀森然
畚鍤其勤雉堞連雲永制爾敵用壯我軍闕譏不稅
水陸無滯遐邇懷來商旅相繼黃崎之勞神改驚濤

緡苑十九
役靈祇力保千萬艘劉驥荀龍墳篋雍雍惟邦維翰
以侯以公元帥梁王武步龍驤挺彼七德削平四方
公能事大推心斯在風雨無渝歲寒不改殊勛茂績
盡瘁宣力國之丹青邦之柱石位冠台鼎任隆兵柄
重以徽章寵分異姓優詔銘功萬古英風貞珉是勒
垂之無窮
天祐三年丙寅歲閏十二月一日准
勅建銀青光祿大夫行尚書禮部侍郎上柱國臣于
兢奉勅撰將仕郎前守京兆府鄠縣尉直文館王
倜書

唐儒林郎試大理評事行幽都府路縣令邊府
君墓誌銘
唐邊魯

惟丙戌之歲仲商之月又十六日嗚呼我先伯父長
官邁疾傾殂於故里以其月二十四日攢塗於正寢
欲詢逾月之制得以送終繼逢逐鹿之秋未遑安厝
緡聯歲序可得而知粵有朝議郎試大理評事前行
鄭州鄭縣令兼侍御史賜緋魚袋愷奇光祿大夫守
刑部尚書行御史中丞上柱國陳留縣開國伯食邑
一千五百戶歸讜卽長官之弟姪也念深同氣痛切
嚴書因感義於鵲鴿遂撫心於霜露特齋餘俸卜葬
先靈乃謂諸姪孫曰方今海宇謐三農告隙俾營
遠日之禮貴就叶龜之吉若非刊勒莫紀聲容其所
誌銘汝當論撰罔遺其善弗虛其美魯仰奉明誨難

愧匪詞道往質今對揚實錄謹敘長官姓邊諱敏字
德成其先陳留人也本枝百世代不乏賢或魚符而
列職或墨綬以聯芳王父諱行存順州司馬神情磊
落閒氣深沉抱環偉之奇才蘊中和之至德妥鍾厥
後實曰俊明烈考諱承遇任丘令孝治承家溫公秉
性蒞事每勤於夙夜臨民恒示於愛威而教彼子孫
備有趨庭之訓敬其祖禰必勤薦享之儀先妣太夫
人太原郡王氏天資益秀婦道彌芳含茲淑善之風
終啓繁昌之允恭惟長官英資倜儻偉量恢宏辭才
則賈馬無稱孝敬乃曾顏讓美當未登顯仕恒奉溫
清見喜色以問安露憂容而侍疾身能禮樂性存典

墳爰從赴聘於招弓便可分榮於宰字擢爲高陽縣
令蒞政之後嘉問允彰單父臨民綽有七絲之詠中
牟作宰不無三異之稱及罷任之初未及踰載而除
官路縣復起頌聲屏宣卧虎之威廳集巢鳩之美立
言必雅莫常顯己所長用意絕私未可屈人之短大
小之物罔不躬決聞望俱高位祿已重賦潘岳閑居
之詠起陶潛歸去之思因罷厥官却訪田里豈謂景
福未終昊天不佑碧落之孤雲易失風窻之短焰難
停歷任三十年享壽五十八我伯母平昌郡孟氏亦
以不登遐壽奄逝流光貞魂諒合於延平青骨同安
於蒿里有子四人長日照故幽都府永清縣令松筠

定操金玉温身方傳襲慶之榮俄邁涉洹之夢次日
隱前攝鄭州長史仁義兼資温恭有譽守其祭祀不
怠厥初次日延徒以積慶韞光未趨顯仕而沒幼子
商裔運州左都押衙以職居鄉外身列陪臣空深怙
恃之悲莫奉松楸之禮孫子六人讓能去非光又霸
孫嵐孫天留並謙冲立志詩禮飭身咸懷踵慶之風
大有興宗之譽孫女三人義姐王師小姐或訖有絲
蘿或年才齠齻克著雍容之德允口貞順之規於戲
生而無過歿而有後者其為長口口幼口口口口
不歌春杵不鳴歸墟也口連車口乃梁鄧之口贈弔
有口則金張之系以庚申年十一月廿四日安神於

任丘縣長丘鄉孝慈里靖隧先墳之次禮也靈輻駕
野丹旒懸空爰開烏兆之塋實掩賢英之墓恭承日
照嚴旨謹作銘云

博哉貴胄踵慶於門山河其度金玉其身蘊十善道
為百里君立功於國流愛於民豈期遭禍一旦歸魂
委宅幽壤慮謝音塵爰刊琬琰紀錄其勤日往月來
兮良銘此地付子孫兮傳揚萬春此說不書時代錄
附唐末以俟再考

晉故竭誠匡定保父功臣特進檢校太保右金
吾衛上將軍兼御史大夫上柱國長沙郡開
國公食邑一千八百戶食實封一百戶贈太

傅羅公墓誌銘

并序

五代

殷鵬

續范

九

夫天地肅物松柏猶或後凋郊藪呈芳芝蘭焉能長
秀故老氏有必摧之歎仲尼興不實之悲衆木低而
梁棟傾嚴霜重而祥瑞去物之有矣可得喻焉公諱
周敬字尚素其先顓頊之允也封於羅以國爲氏地
連長沙因家焉公卽長沙之後也曾祖讓皇檢校司
空累贈太師封南陽王娶宋氏封越國太夫人祖諱
宏信皇天雄軍節度使檢校太師兼中書令長沙王
累贈守太師累封趙王諡曰莊肅娶趙國夫人呂氏
先薨又娶吳國夫人王氏爲時之瑞命世而生倜儻
不羣英雄自許有唐之末大盜勃興鎮守一方廓清
千里上則忠於社稷下則施及子孫烈考諱紹威皇

天雄軍節度使守太師兼中書令鄴王贈守尚書令
諡曰貞莊天地鍾秀山河孕靈下筆則泉湧其文橫
戈則雷震其武惠惟及物明可照奸曠古已來罕有
其比貞莊有子四人長廷規天雄軍節度副大使檢
校太傅駙馬都尉少薨贈侍中次周翰義成軍節度
使檢校太傅駙馬都尉亦少薨贈侍中次周允前保
大軍行軍司馬檢校兵部郎中兼御史大夫柱國賜
紫金魚袋早歷通班繼爲上介綽有器業可奉箕裘
公卽貞莊公第三子也性稟淳和生知禮樂早失天
廕幼奉母儀秦國夫人劉氏卽故兗州節度使太師
公之弟三女也肅雍無比柔順有聞示以愛慈加之

續苑十九

三

訓導遂令諸子悉著美名時梁乾化初公之次兄方
鎮南燕公時年九歲秦國夫人歸_宣於兗州太師之
宅遂命侍行至闕下梁末主宣召入內對敎明庭進
退有度上甚器重之遂授檢校尚書禮部員外郎仍
賜紫金魚袋自此恒在宮禁出入扈從乘輿與皇親
無閒待立冕旒多備顧問無非辯對深怡宸衷上尤
竒之其年秋七月歸南燕甲戌秋七月公之次兄薨
於滑州之公府上聞訃奏乃謂近臣曰羅氏大勲之
後宜賞延遂命公權知滑州軍州事檢校禮部尚書
冬十月上表乞入覲十一月至京師朝謝畢翌日有
制授宣義軍節度使檢校尚書右僕射年方十歲位

冠五侯甘羅佩印之初未爲少達王儉登壇之日已
是老成十二月至自京師乙亥春二月鄴中搆亂河
上屯兵況處要衝屬茲征伐事無巨細公必躬親道
路有頌聲軍民無撓政丙子春二月移鎮許田加檢
校尚書左僕射是歲公年始十二作事可法好謀而
成政絕煩苛人臻富壽忽下徵黃之詔俄諧會尸之
期戊寅秋七月朝于京師有詔尚主公拜表數四辭
不獲免遂授檢校司空守殿中監駙馬都尉壬午冬
十月出降普安公主傅粉何郎晨趨月殿吹簫秦女
夜渡星橋一時之盛事難儔千古之清風盡在癸未
春三月除光祿卿冬十月唐莊宗收復梁園中興唐

祚屬當郊祀無失職司遂封開國侯加食邑三百戶
至明宗慕紹之初除右金吾衛大將軍充街使秋九
月轉左金吾衛大將軍充街使執金在彤庭之前佩
玉向丹墀之上仕宦之貴無出於斯上以公久居環
衛之班頗著警巡之効至戊子二月有制授匡國軍
節度使加檢校司徒仍賜耀忠匡定保節功臣下車
之後布政惟新福星爰照於左馮暖律又來於沙苑
庚寅夏四月上以圓丘禮畢慶澤溥行就加檢校太
保仍降璽書其年冬十一月朝于京師除左監門衛
上將軍九月轉左領衛上將軍辛卯夏六月轉左武
衛上將軍癸巳五月除左羽林統軍甲午春加特進

階封開國公食邑二百戶改賜竭誠匡定保又功臣
丙申九月唐廢主以汴師北征命公以所部禁旅巡
警夷門公英斷不回至仁有勇當危疑之際立鎮靜
之功浚郊之民于今受賜今皇帝并門鳳舉洛水龍
飛力願推崇首來入覲上嘉其懿効旌彼殊庸遂除
右金吾上將軍美哉出摠藩宣入居嚴衛外則作疲
民之藥石內則爲天子之爪牙文武兩班踐揚將遍
物禁太盛古之有言壽年未高染疾不起以天福二
年七月二十七日薨於汴州道德坊之私第享年三
十有三嗚呼皇天莫問徒云輔德之言大夜何長共
有殲良之歎上聞所奏惻怛哀慟輟視朝兩日厚加

賜幣贈太傅君臣之義終始克全公以己丑歲五月
梁普安公主薨於同州後再娶東海郡徐氏夫人卽
故東川節度使太師弟五女也蕙質蘭姿懿德令範
孰念孤鸞之歎自傷黃鵠之歌公有姪延□見任閑
廐副使卽魏博副大將軍侍中之子也杵玉其儀渾
金其器度□□□相貌□□□□人欽□□公
亦三子四女長子延賞守太子舍人次延緒次延宗
皆稟庭訓悉紹家聲龍駒鳳雛得非天性良金瑞玉
自是國楨終天懷風樹之悲踣地有蓼莪之痛長女
適郝氏次適婁氏二女方幼諸子皆普安公主之出
也公主靜惟閑雅動有規儀休聲首冠於皇親淑德

克彰於婦道帝王之女無以過焉公性不好弄幼善
屬文嚴毅而至和溫恭而難犯言惟合道動不違仁
張充一變之年已功成名遂潘岳二毛之日乃善始
令終以丁酉歲冬十月六日安葬於洛陽縣之原禮
也孤子延賞等泣告鵬曰公之履行為衆所知公之
勲庸歷代罕比若非故舊孰能縷陳鵬列親表之閒
受顧念尤最難避狂簡輒勒貞珉序不盡言乃爲銘
曰
積慶之門挺生奇傑入覲堯庭出持漢節十乘啓行
萬夫觀政宵旰無憂袴襦入詠英華發外清明在躬
惟忠惟孝立事立功滑臺去思璧田來暮藹然休光

綽有餘裕。擢繡文翰。傅粉容儀。承顏紫禁。飛步丹墀。門盛七葉。祿逾萬石。外冠時英。內光帝戚。歷事累朝。薦逢多難。動有成功。舉無遺算。秋敗芳蘭。地埋良玉。山雲晚愁。林風夜哭。王孫一去。今不復還。陵園草色。兮秋黃春綠。

朝議大夫行起居郎充史館修撰

柱國殷鵬撰并書。

羅周敬傳見薛居正五代史九十一

紹之初除右金吾衛大將軍充街使則薛史歐史俱稱歷左右金吾大將軍在莊宗時誤也

臨卽教授程伯剛墓誌銘

宋劉光祖

吾友程公說字伯剛眉之丹稜人居於敘之宣化伯剛靜而文方教授臨卽官滿成都臺府爭辟舉之間

逆曦以屬叛毀車馬棄衣冠卽日逃歸入門而號以白其父其父與宣化令始知之相與驚憤不能食伯剛白有司乞休官侍親入深山若將避世者對客輒流涕其弟公碩字仲遜時分教益冒艱危中誓不辱賊賊平而伯剛以積憂傷且方奔避時失食飲節忽忽病醫誤投之藥汗不止遂死開禧三年三月二十三日也年三十有七仲遜丐檄走哭喪次與其父相向慟已而父收涕語曰若兄之未生也吾夜夢立門外一青衿童子挽吾衣曰我爲公嗣問其所從來則曰我青神先生兒也明年而若兄生長而父師不煩於教當此變亂與汝隔不相聞若兄入縣西北安固

山爲終焉計不復問家事但攜所著春秋諸書以自
隨謂諸弟曰我嘗遊青城大而諸山徘徊不忍去去
之三年日往來於懷也今此山遠城市茂草木吾心
有感焉語未既泣數行下曰妖氣未除世路艱棘吾
欲從此逝矣疾革父母問所欲言無他語但云仙階
淺未足以成功名答其弟其子亦然殮之夕從弟仲
藝夢若兄言我故青城山人也吾父乃以爲眉之青
神宜爲我一正其誤先是汝兄方之少城出門連夕
雪汝弟公辰夢一黃衣告以兄所辟兩闕俱非當授
青城山見次哀哉數事如合參吾兒之生死如此復
相向慟失聲其卒之明年嘉定元年十月乙酉葬之

於縣西馬泉山之原仲遜授學於伯剛伯剛與仲遜
同年舉進士既仕矣俱以所學孳孳質於余伯剛骨
秀而神清尤積學苦志平生於春秋一書究之反覆
不厭有春秋分記九十卷左氏始終三十六卷通例
二十卷比事十卷勤矣哉而未嘗止也又取諸儒講
解鉤纂之名曰精義病中猶不去手書未及成而卒
伯剛性恬潔居無惰容得伊洛諸書服膺焉不臻其
極不已有語錄二卷士訓一卷詩文二十卷程氏大
宗譜十二卷此其爲志何如也自伯剛率諸弟以學
連二舉兄弟同薦者五人伯剛凡兩薦登科時年二
十有五既與其弟各調官待次杜門潛心人罕識其

面曰它日欲求此樂不可得也及試吏廣都簿遇事
人服其公清部使者傅寺丞使代老令理其縣吏不
敢侮邛州號多士伯剛掌教不肯苟不使郡太守奪
其職宇文侯下車始得以經訓古道從事士風遂振
鄉長老李德秀盛稱之凡號端方士皆深知伯剛伯
剛則行其所學非苟求知者也不幸蚤世以通直郎
賁其終伯剛之父名符孫蓄學不售祖諱志行少豪
於才以承信郎鎖其廳薦居詞賦首曾祖諱準兩貢
辟廳有聲六世祖自汴歸蜀愛郁鄜山川而居焉今
宣化是也伯剛之母魚耶孫氏有賢德妻隄爲王氏
女也二子長曰元子前伯剛七年卒次曰光老女曰

前一月卒次曰嘉伯剛之葬也仲遜無以塞其父
之悲乃來請銘銘曰

祠西之峯有翩其童暫下人世兮還山無蹤曷不少
俟以遊夫蓬萊道山之宮曰吾未足以成功也獨留
遺冢與遺書使思子兮無窮我爲勒銘識其幽封月
明山空魂其歸來蕭蕭松風已矣乎聊託吾文慰而
翁無索之於杳冥之中春秋分紀勝近人大事表遠
甚借通志堂未會彙入經解
又無好事者刊刻單行今錄載公說墓
誌使世間知此書庶幾終傳於後尔

續古文苑卷第十九

續古文苑卷第二十

賜進士及第授通奉大夫山東通省督糧道加三級孫星衍撰

誄

大司馬吳漢誄

漢杜篤

篤以為堯隆稷契舜嘉皇陶伊尹佐殷呂尚翼周若此五臣功無與疇今漢吳公追而六之乃作誄曰朝失鯁臣國喪爪牙天子愍悼中宮咨嗟四方殘暴公不征茲征茲海內公其攸平泯泯羣黎賴公以寧勲業既崇持盈守虛功成即退挹而損諸死而不朽名勒丹書功著金石與日月俱

和帝誄

蘇順

天王徂登率土奄傷如何昊穹奪我聖皇恩德累代
乃作銘章其辭曰
恭惟大行配天建德陶元二化風流萬國立我蒸民
宜此儀則厥初生民三五作綱載藉之盛著於虞唐
恭惟大行爰同其光自昔何爲欽明允塞恭惟大行
天覆地載無爲而治冠斯往代往代崎嶇諸夏擅命
爰茲發號民樂其政奄有萬國民臣咸秩大孝備矣
闕宮有恤由昔姜嫄祖妣之室本枝百世神契惟一
彌留不豫道揚末命勞謙有終實惟其性衣不制新
犀玉遠屏履和而行威稜上古洪澤滂流茂化沾溥
不懋少留民斯何怙獻歆成雲涕泣成雨昊天不弔

喪我慈父

萬年公主誄

晉左九嬪

昔蒲衣早智周晉夙成咸以岐嶷名存典經猗歎公
主在幼尅哲方德比齒有邈先烈何德之盛而年或
闕何華之繁而實不結雨墜風逝形影長滅赫赫京
室河洛所經陰精發曜降茲淑靈篤生公主誕膺休
禎秀生紫微日暉月明紅顏鬢髮金質玉形二句據太平御覽
四引補既睇艷姿徽音孔昭盼倩其媚婉曼其嬌
寵玩軒陛如瓊如瑤雖則弱齒雙德兼苞五福所集
聞之先民積善鍾慶祐德輔仁宜終淑美光暉日新
云何降戾景命不振晔晔榮曜英蕤始芳何幸于天

猥遇降霜熒熒稚魂飄飄遐翔於戲何辜痛茲不福
生而何晚歿而何速酷矣皇靈謬哉司祿嗚呼哀哉
日月載馳白露凝結自主薨徂奄離時節吉凶乖邈
存亡異制將遷幽都潛神永翳嗚呼公主魂豈是綏
岌岌靈輜駿駟駢駢挽僮齊唱悲音激摧士女歔歔
高風增哀一日不見採蕭作歌况我公主形滅體訛
精靈遷逝幽此中阿言思言念涕淚滂沱嗚呼哀哉

弔文 哀詞

弔張衡文

南岳有精君誕其姿清河有理君達其機故能下筆
辭繡揚手文飛昔伊尹值湯呂尚遇旦嗟矣君生而

漢 禰衡

星而朽星華而滅唯道興隆悠永靡絕君
音永浮河水有竭君聲永流周旦先沒發夢孔丘余
生雖後身亦存遊士殞知己君其勿憂

弔夷齊文

魏 糜元

少承洪烈從戎於王側聞先生餓於首陽敢不敬弔
寄之山岡嗚呼哀哉夫五德更運天秩靡常如有絕
代之主必有受命之王故堯德終于虞舜禹祚殄于
成湯且夏后之末祀亦殷氏之所亡若周武爲有失
則帝乙亦有傷子不弃殷而餓死何獨背周而深藏
是識春香之爲馥而不知秋蘭之亦芳也

續苑二十一

覽無御所

在誰路而子絕之首陽誰山而子匿之彼薇誰菜而子食之行周之道藏周之林讀周之書彈周之琴飲周之水食周之芩而誘周之主謂周之淫是謂聖之文聽聖之音居聖之世而異聖之心嗟乎二子何痛之深

二句御覽無痛案隋書經籍志梁有散騎常侍康元集五卷亡

溧陽侯陶謙哀詞

吳張昭

猗歟使君君侯將軍膺秉懿德允武允文體足剛直守以溫仁令舒及廬遺愛於民牧幽暨徐甘棠是均憬憬夷貊賴侯以清蠢蠢妖寇匪侯不寧唯帝念績爵命以章既牧且侯啓土溧陽遂升上將受號安東將平世難社稷是崇降年不永奄忽殂薨喪覆失恃

民知困窮曾不旬日五郡潰崩哀我人斯將誰仰憑

追思靡及仰叫皇穹嗚呼哀哉

漢獻帝興平元年溧陽侯陶謙墓在溧陽考證云後

晉成帝哀策文

宸極寥廓聖靈遐之哀備物之虛在痛永往之無期乃命史官述德寄辭其辭曰

五德代興素靈啓曜離光疊暉三辰重照明明我皇含貞挺妙元秀夙達履德罔違鳳棲遐邈神宇凝夷文明外潤仁簡內綏舉無遺中鑒無幽微韻隆汾陽道侔垂拱靜恭清穆冥功日用亶亶神軌同天攸縱爰有陽九紀綱中替姦豎肆逆牢羅失衛升降艱難

協應神契靈祚既保顯揚天命雲霧朝晞兩儀開鏡
訓諮阿衡虛已絕正九功潛流七德將表方振宏羅
稜威電掃芟蕩神衢一我王道昊天不弔降茲大悔
天傾其儀地覆其載大業未究神爽還背哀貫三靈
痛流萬代爰初不豫大漸在躬啓手歸全神氣夷沖
凝哉達識體正履終袞龍旣襲玉容斯幽登醪虛設
觴爵靡酬墳牘莫啓聖迹誰修冥冥我皇神焉何遊
撫膺遐叫迸涕交流三筮告期將歸陵墟陞殯羽翼
庭納龍輿玉輪動運錫鸞鳴衢錫旆徘徊六驥踟躕
輕雲蔭舉流風翼車哀哀同軌唯唯輓夫長號永慕
泣涕漣洳大塊獨運終歸其始我后永往神千祀

悠悠上天熒熒惟已渺然靡憑廓焉無恃目範令儀
徽音在耳

晉孝武帝哀策文

晉王恂

同軌畢至百司胥亞法物夕陳輶輅夙駕親執饋奠
長號永夜懼鼓刻之過盡哀良辰之莫借悲宮宇之
寥廓痛聖儀之幽化夫至德無名固理絕稱謂然祝
史陳辭亦臣子所貴寄窮情於翰墨庶遺塵之髣髴
其辭曰

惟皇作極五德迭允康實復夏武亦隆晉豐豐太宗
希夷其韻鏡之者元撫之者順於穆皇考嗣徽絕軌
前聖後哲契合一揆心去其伐行遺其美廢華任誠

捨荃存旨。惟深通志。羣方咸秩。惟幾成務。能事斯畢。
未若我皇。至則不疾。恢恢天網。䟽而莫失。居有以虛。
宰多以少。簡則可從。靜則不擾。信及豚魚。澤被億兆。
湛然司契。坐一八表。園陵既衛。威靈赫赫。子來既構。
寢廟奕奕。武曰止戈。戎不極役。文教聿修。有恥且格。
迹有遠邇。感無高深。道之所被。改色革音。皓獸馴苑。
素羽棲林。殊柯通理。異蒂同根。方融元液。陶鑄斯民。
雲韶候奏。比屋思淳積。祐莫應天。罰奄臻太。山頽構。
洪瀆竭津。何殃之甚。何酷之殷。自羅豎凶。二氣代變。
霜繁廣除。風迴高殿。帷幙空張。肴俎虛薦。極聽無聞。
詳視罔見。人神道殊。吉凶有禮。龜筮參謀。埏隧告啓。

史臣考古警者在陞攀援忪忪惟兄及弟龍輿肅以
引邁前驪紛以抗旒城闕儼以整列馳道亘以通修
悲平昔之所幸豈斯路之復由輓哀唱以翼衡駟悲
鳴而顧輶違華宇之晰晰卽永夜之悠悠奉靈櫬而
長訣緬終天而莫收訴穹蒼以叫踊洞五內其若拙
儻性命之可贖甘人百於山丘茫茫大運靡始不終
哲王遺世貴在道融昭哉我皇萬代流風良史式述
德音永隆

弔嵇中散文

晉李充

先生挺邈世之風資高明之質神蕭蕭以宏遠志落
落以遐逸忘尊榮於華堂恬卑靜於蓬室寧漆園之

逍遙安柱下之得一寄欣孤松取樂竹林尚想榮莊
聊與抽簪味孤鷗之濁醪鳴七絃之清琴慕義人於
元旨詠千載之徽音凌晨風而長嘯託歸流而永吟
乃自足於丘壑孰有愠乎陸沉馬樂原而翹足龜悅
塗而曳尾疇廟堂之是榮豈和鈞之足視凡先生之
所期羌元達於遐旨尚遺大以出生何殉小而人死
嗟乎先生逢時命之不了冀後凋於歲寒遭繁霜而
夏零滅皎皎之玉質絕琅琅之金聲援明珠以彈雀
損所重而為輕諒鄙心之不爽非大雅之所營

吊比干文

後魏 孝文帝

唯皇構選中之元載歲御次平關茂望舒會於星紀

十有四日日唯甲申子揚和淇右蹀駟鄘西指崧原
而搖步順京途以戡任路歷商區轄屆衛壤泛目睇
川縱覽觀陸遂傍睨古跡游瞰曩風覩殷比干之墓
悵然悼懷案讀當於此字句絕焉乃命馭駐輪笑驥躬矚荆棘
棘荒朽工為縣蕞字茂而遺猷明密事若對德慨狂后
之猖穢傷貞臣之粹節聊興其韻貽弔云爾 曰
三才之戢元兮敷五靈以扶德含剛柔於金木兮資
明闇於南北重離耀其炎暉兮曾坎司元以秉黑伊
稟常之懷生兮昏睿遁其戩則晝皎皎其何朗兮夜
幽幽而致弊哲人昭昭而澄光兮狂夫黜黜其若翳
咨堯舜之耿介兮何桀紂之猖敗沈湎而不知甲兮

終或感已以貽戾。譽譽兮比千，藉胃兮殷宗。含精兮
誕粹，寘樹兮英風。稟蘭露以滌神，飡藥菊英而儼容。
茹薜荔以蕩識，佩江離而麗躬。履霜以結水兮，卒窘
忠而弥濃。千金豈其吾珍兮，皇舉寔余所鍾。奮誠諫
而燼軀兮，導危言以禦鋒。嗚呼哀哉，嗚呼哀哉。惟子
在殷，實爲樑棟。外贊九功，內徽辰共。匡率袞職，德音
遐洞。周師還旆，非子誰貢。否哉悖運，邁此不辰。三綱
道沒，七曜輝泯。負乘竊器，怠棄天倫。懷誠齋怒，讜言
爲陳。晷侯已醢，子不見歟。邢侯已脯，子不聞歟。微子
去矣，子不知歟。箕子奴矣，子不覺歟。何其輕生，一致
斯歟。何其愛義，勇若歸歟。遺體既灰，不其惜歟。永矣

無返不其痛歟。嗚呼哀哉，嗚呼哀哉。夫天地之長遠
兮，嗟人生短促。多殃住往者，子弗及兮。來者子不履
厥當，胡契濶之屯直兮。值昏化而永良，曷不相時以
卷舒兮。徒委質而嶺顛亡，雖虛名空傳於千載。詎何
勳之可揚，奚若騰颯以遠逝。飛足而歸昌，得比肩於
尚父。卒同協於周王，建鴻績於盛辰。戢肯字於齊方，
闡穆音乎万祀。傳冕業以脩長，而乃自受茲斃。視
竅殷系，字剖心無補。迷機喪身，脫非武發。封墓誰回，
嗚呼介士。胡不我臣。重曰：世惛惛而溷濁兮，日
藹藹其無光。時坎廩而險隘兮，氣僚颺以飛霜。子奚
其不遠逝兮，侘傺而陟故鄉。可乘梓梓以浮滄兮，求

蓬萊而爲糗銜芝條以昇虛兮與赤松而翱翔被芟
荷之輕衣兮曳扶容之萌裳循海波而澌颺兮望
會稽以歸禹紐蕙芷以爲紳兮扈荃佩而容与寫鬱
結於聖人兮暢中心之祕語執垂益而談卡弄兮交
良朋而憶摠字金石文字非苦言既而東騰兮吸朝霞
而長舉登岷巘而悵望兮眺扶桑以停佇謁靈威以
問路兮乘谷風而扳宇遂假載於羲和兮憑六螭以
南處翥衡嶽而顧步兮濯沅湘以自潔嚼炎州之八
桂兮踐九疑而遙襲卽蒼梧而宗舜兮拂埃霧以就
列採輕越而肅帶兮切寶犀以貫分許淳風之淪
覆兮話蕭韶之湮滅召熊羆而叙釋兮問重華之風

桀尔乃飲正陽之精氣兮遊丹丘而明視捐捐祝融
而求鳥兮御朱鸞以脩指因景風而凌天兮迴靈鷄
之雞以西履降黃渚而造稷兮慰稼穡之艱難訪有邨
之洗洗兮遇何主而獲安然後陟崑崙之翠嶺兮攀
瓊枝而槃桓步懸圃以溜澆兮咀玉英而折蘭厯崦
嵫而一顧兮府俯沐髮於洧盤仰從倚於閭闔兮
請帝閭而戩關天沈寥而廓落兮地窈濛而遼闊滄
淪陰以裨氣兮佩瑤珥而鳴鏘拜招矩而脩節兮少
躊躇以相羊祈驩驥而摠韁兮隨秦風以颺揚瞰不
周而左旋兮縱神駟以北望尋流沙而騁轡轡兮暨
陽周以緹駕靡芸芳以馥體兮索夷杜而板衙奉軒

輓而陳辭兮申時俗之不暇適岐伯而脩命兮展力
牧以問霸歎沅澧之純粹兮闢寒門之層冰聆廣
莫之颺颺字瑟兮覲黔羸而迴凝擁元武以涉虛兮瓦
神寘而威陵象曖曖而掩鬱兮途曩曩其難勝笑飛
廉而前驅兮使燭龍以輝澄歸中樞而睇睨兮想元
漠之已周慨飛蠅之無寄兮颯翺袂而上浮引雄虹
而登峻兮揚雲旗以軒遊躍八龍之蜿蜿兮振玉鸞
之啾啾奉彗星以朗導兮委升軻乎大儀敖重暘之
帝宮兮凝精魄於旋曦扈陽曜而靈脩兮豈傳說之
足竒但至槩之不悛兮寧溘死而不移

告秦華府君文

唐韓賞

惟廿七祀孟秋右補闕韓賞敢昭告于秦華府君祠
廟惟天地生于人惟山川主乎神人有識而神有靈
人貴聰而神貴明於昭靈山與天窈冥載在祀典鎮
于上京自古帝王徵應不一荒淫者神降之凶聖哲
者神授之吉惟茲臣庶鑒乎得失今予小子造于神
祠將有所盟神其聽之人有嗜好各為私禱顧無所
求唯道是憂今者內禱於身外盟於神如有一心公
朝戮力生人惟神是福崎嶇世道僊俛在位惟神所
殛必將忘身奉國為本圖憂國濟人為己任明明泰
華昭鑒于茲瞻彼牲牢抑惟常禮神嗜正直意存精
誠正直以享神精誠以享意拳然踟慮瞿然改容益

靈山之嵯峨增壽宮之肅穆歷階趨進髣髴其形尚
饗天寶元年歲次壬午四月乙亥朔十日甲申
正議大夫太僕少卿兼太山別駕諸王侍書榮王
府司馬韓擇木書

祭文

釋奠祭孔子文

晉庾亮

維咸康三年荆豫州刺史都亭侯庾亮敬告孔聖明
靈詩書煥於唐虞憲章盛於文武然後黎民時雍彝
倫攸敘幽厲積構玉繩絕紀高岸爲谷六合錯否上
凌夷而失教下苟免而無恥公以元聖之靈應感圓
通萬物我賴匪我求蒙夫子既沒洪範乖流秦雖慢

道漢聿孔修洎我皇晉仰欽大猷宗聖既建遐胄俾
侯令月吉辰祇陳大禮磬管鏘鏘威儀濟濟嘉奠既
設欽若靈規心存鳳德尚想來儀神其歆之降鑒在
斯

祭牙文

晉袁宏

天生五才治道所司廢一不可靜亂輔時赫赫晉德
乃武乃文中世不競王度暫屯戎狄滑夏虔劉生民
蠢爾東胡被髮左袂思我皇澤稽首海裏受爵納貢
服膺累世後嗣不恭實叛實戾侵我神畿隔我嘉惠
哀彼黎民嬰此彫殘沉荷大寵任其艱難慨然發憤
撫劍忘滄敢建高牙烈烈桓桓

祭梁鴻文

晉周穎文

晉隆安四年陳郡周穎文以蘊藻行潦祠于梁先生之墓夫子邁志箕穎塵垢雕俗骨秀風霜性淳寡欲娶待偕隱之儷文絕陪臣之錄遂負策周魯之郊逆旅吳會之阿可謂高竒絕倫孤生莫和者也後學撫牘得人在文忽以知命而展其墳茫茫積草有馥餘芬昔先生過延陵而想季經海隅而感連苟踐跡而趣合亦斷金於當年

祭夫文

梁徐悱妻劉氏

維梁大同五年新婦謹薦少牢於徐府君之靈曰惟君德爰禮智才兼文雅學比山成辯同河瀉明經

擢秀光朝振野調逸許中聲高洛下含潘度陸超然邁賈二儀既肇判合始分簡賢依德乃隸夫君外治徒奉內佐無聞幸移蓬性頗習蘭薰式傳琴瑟相酬典墳輔仁難驗神情易促霄碎春紅霜雕夏綠躬奉正衾親觀啓足一見無期百身何贖嗚呼哀哉生死雖殊情親猶一敢遵先好手調薑橘素俎空乾奠觴徒溢昔奉齊眉異於今日從軍暫別且思樓中薄遊未反尚比飛蓬如當此訣永痛無窮百年何幾泉穴方同

祭陳伯玉文

唐盧藏用

子之生也珠圓流兮玉方潔子之沒也太山頽兮良

續苑二十
木折士林閨寂兮人物踈門館蕭條兮賓侶絕嘆佳
城之不返辭玉階而長別嗚呼置酒祭子子不顧沈
聲哭子子不迴唯天道而無託但撫心而已摧

雜文

用筆法

秦李斯

夫書之微妙道合自然篆籀以前不可得而聞矣自
上古作大篆頗行於世但為古遠人多不詳今斯刪
畧繁者取其合理參為小篆凡書非但裏結流快終
藉筆力輕健蒙將軍恬筆經猶自簡畧斯更修改望
益於用矣用筆法先急回後疾下鷹望鵬逝信之自
然不得重改如游魚得水景山與雲或卷或舒乍輕

乍重善思之此理可見矣

斯善書自趙高已下

咸見推伏刻諸名山碑璽銅人並斯之筆斯書秦望
紀功石云吾死後五百三十年間當有一人替吾跡
焉一本作九
百四十年

僮約

漢王褒

蜀郡王子淵以事到前止寡婦楊惠舍惠有夫時奴
名便了子淵倩奴行酤酒便了拽大杖上夫冢巔曰
大夫買便了時但要守家不要為他人男子酤酒子
淵大怒曰奴寧欲賣耶惠曰奴大忤人人無欲者子
淵即決買券云重案本誤不奴復曰欲使皆上券不
上券便了不能為也子淵曰諾券文曰神爵三年正

續苑二十

雜

月十五日資中男子王子淵從成都安志里女子楊
惠買亡夫時戶下髯奴便了決賈萬五千奴當從百
役使不得有二三言晨起早掃食了洗滌居當穿白縛
帶裁孟鑿斗浚渠縛落鉏園斫陌案句絕章樵誤以
知落陌杜埠音苑地刻大枷屈竹作杷削治鹿盧出
入不得騎馬載車蹠坐大呶下床振頭捶案本誤鉤
此字依藝支類聚刈芻結葦臘瀘汲水初學記依酪佐依初
學苑祖音醜音織履作麤雀張鳥結網捕魚繳
鴈彈鳧登山射鹿入水捕龜後園縱養鴈鶩百餘驅
逐鴟鳥持梢牧猪種薑養芋羊案本誤長育豚駒糞除
堂廡此二字依類聚餽食音苑馬牛鼓四起坐夜半益芻

二月春分被隄杜疆落桑皮櫻御覽注云櫻併欄也
種瓜作苑昨音瓠音別茄披葱苑復音○案此字
收芋皆春乃發之章集破封日中苑黃未詳御覽在所不
引中無以復音不合也雞鳴起春調治馬戶兼落三
作莫然與復音不合也雞鳴起春調治馬戶兼落三
重御覽注云馬戶欲食乃取之舍中有客提壺行
酤汲水作舖音苑滌音杯整音園中拔蒜斷蘇切脯築
肉臛芋膾魚魚鱉烹茶盡具已而初此字依蓋藏關門
塞竇餒猪縱犬勿與鄰里爭鬪奴但當飯豆飲水不
得嗜酒欲飲美酒唯得染唇漬口不得傾盂覆斗不
得辰出夜入交關伴偶舍後有樹當裁作船上至江
州下到湔蓋案句絕章樵誤連下讀主為府掾求用錢

續苑二十一

三

推訪聖御覽注云販櫻索縣亭買席往來都洛當為
婦女求脂澤販於小市歸都擔泉轉出旁蹉
名牽犬販鵝武都買茶都縣名出茶武楊氏
字今據擔荷御覽注云荷往來市聚慎護奸偷入市
不得夷蹲旁卧惡言醜罵多作刀矛持入益州貨易
羊牛案本誤奴自教精慧不得癡愚持斧入山斷
裁轅御覽注云若有餘殘當作俎几木屐及彘盤御覽
注云彘盤御覽注云焚薪作炭罪切石薄岸竹籠盛石以薄
音力也案據注學當作罪御覽亦非治舍蓋屋削
披九月當獲十月收豆御覽注云掄麥窖芋御覽

掄麥種御覽注云南安拾栗採橘安縣出橘持車載輦御覽
載輦有利也案已上正文十四多取蒲葶苑約益
字初學記脫去僅見御覽今據補作繩索雨墮無所為當編蔣織薄種植桃李梨柿柘
桑三丈一樹八樹文類聚為行果類相從縱橫相
當果熟收斂不得吮嘗犬吠當起驚告鄰里棖門柱
戶上樓擊鼓御覽注云漢時官不禁報怨民家皆高
取也荷初學記盾曳矛還落三周勤心疾作不得
遊遊奴老力索種莞織席事訖休息當春一石夜半
無事浣衣當白若有私錢主給賓客奴不得有奸私
事事當關白奴不聽教當答一百讀券文適訖詞窮
詐索乞乞叩頭兩手自搏目淚下落鼻涕長一尺審

如王大夫言不如早歸黃土陌丘蚓鑽額早知當爾
為類此字依藝文王大夫酷酒真不敢作惡案此文在
取御初學記故大段全同開有一二小異而已考太
乎御覽五百九十八載有舊注尤足信據如蜀土收芋皆
補者甚多又乃發則知芋今作等之必誤矣馬戶水
門也則知戶今乃發則知芋今作等之必誤矣馬戶水
作惡也則知戶今乃發則知芋今作等之必誤矣馬戶水
凡此御覽正文矣其未嘗誤也則知芋今作等之必誤矣
燕說乃就取其所兼舊注未悉撰人名氏借御覽載之
不盡校定重載於此初學記古文苑皆言此亦附鄰見
多誤滋已相得通庶垂之力來也

難蓋天八事

漢楊雄

一曰日之東行循黃道晝中規牽牛距北極北百一
十度東井距北極南七十度并百八十度周三徑一
二十八宿周天當五百四十度今三百六十度何也
二曰春秋分之日正出在卯入在酉而晝漏五十刻
即天蓋轉夜當倍晝今夜亦五十刻何也三曰日入
而星見日出而不見即斗下見日六月不見日六月
北斗亦當見六月不見六月今夜常見何也四曰以
蓋圖視天河起斗而東入狼弧間曲如輪今視天河
直如繩何也五曰周天二十八宿以蓋圖視天星見
者當少不見者當多今見與不見筭何出入無冬夏
而兩宿十四星常見不以日長短故見有多少何也
六曰天至高也地至卑也日託天而旋可謂至高矣
縱人目可奪水與景不可奪也今從高山上以水望

續苑二冊

共

日日出水下影上行何也七曰視物近則大遠則小今日與北斗近我而小遠我而大何也八曰視蓋橈與車輻間近杠轂即密益遠益疎今北極為天杠轂二十八宿為天橈輻以星度度天南方次地星間當數倍今交密何也文見隋書天文志云以通渾天張溥所輯揚子雲集有其目未載其

文故錄之

靈憲

漢張衡

昔在先王將步天路用定靈軌尋緒本元先準之於渾體是為正儀立度而皇極有道建也樞運有道稽也乃建乃稽斯經天常聖人無心因茲以生心故靈憲作興曰太素之前幽清元靜寂漠冥默不可為象

厥中惟虛厥外惟無如是者永久焉斯謂溟滓蓋乃道之根也道根既建自無生有太素始萌萌而未兆并氣同色渾沌不分故道志之言云有物渾成先天地生其氣體固未可得而形其遲遠固未可得而紀也如是者又永久焉斯謂龐鴻蓋乃道之幹也道幹既有育物成體於是元氣剖判剛柔始分清濁異位天成於外地定於內天體於陽故圓以動地體於陰故平以靜動以行施靜以合化堙鬱構精時育庶類斯謂天元蓋乃道之實也在天成象在地成形天有九位地有九域天有三辰地有三形有象可效有形可度情性萬殊旁通感薄自然相生莫之能紀於是

人之精者作聖實始紀綱而經緯之八極之維徑二
億三萬二千三百里南北則短減千里東西則廣增
千里自地至天御覽二引有一億一萬六千里在此下半於八極
則地之深亦如之通而度之則是渾已將覆其數用
重差鈎股懸天之景薄地之儀皆移千里而差一寸
得之過此而往者未之或知也未之或知者宇宙之
謂也宇之表無極宙之端無窮天有兩儀以儻道中
其可觀樞星是也謂之北極在南者不著故聖人弗
之名焉其世之遂句誤未詳九分而減二陽道左迴故天
運左行有驗於物則人氣左羸形左繚也天以陽迴
地以陰淳是故天致其動稟氣舒光地致其靜承施

候明天以順動不失其中則四時順至寒暑不忒致
生有節故品物用生地以靈靜作合承天清化致養
四時而後育故品物用成凡至大莫如天至厚莫如
地地至質者曰地而已句誤未詳至多莫如水水精為漢
漢周於天而無列焉思次質也句誤未詳地有山嶽以宣
其氣精種為星星也者體生於地精成於天隋志引成作發
列居錯跂各有迥屬紫宮為皇極之居太微為五帝
之廷隋志引皇極作帝皇庭作坐明堂之房大角有席天市有坐
蒼龍連蜷於左白虎猛據於右朱雀奮翼於前靈龜
圈首於後黃神軒轅於中六擾既畜而狼旼魚鼈罔
有不具在野象物在朝象官在人象事於是備矣懸

象著明莫大乎日月其徑當天周七百三十六分之
一案祖暅之所見四作三地廣二百四十二分之一以八約之得二十九與
陽之類其數奇月者陰精之宗積而成獸象兔陰之
類其數偶其後有馮焉者昇請無死之藥於西王母
恒娥竊之以奔月將往枚筮之於有黃有黃占之曰
吉翩翩歸妹獨將西行逢天晦芒母驚母恐後且大
昌恒娥遂託身於月是為蟾蜍夫日譬猶火月譬猶
水火則外光水則含景故月光生於日之所照魄生
於日之所蔽當日則光盈就日則光盡也眾星被耀
因水轉光當日之衝光常不合者蔽於地也是謂闇

虛在星星微月過則食日之薄地暗其明也案舊脫
依隋書天方於中天文志引補天地同明繇明瞻明隋志引無此四字案
明還自尊案明舊誤暗今故望之若小者誤火當夜
而揚光在晝則不明也月之於夜與日同而差微星
則不然強弱之差也眾星列布其以神著有五列焉
是為三十五名一居中央謂之北斗動變挺占隋志
動係實司王命四布於方為二十八宿日月運行於歷
示吉凶五緯經次用告禍福則天心於是見矣中外
之官常明者百有二十四續漢書注有四字隋志可
名者三百二十為星二千五百而海人之占未存焉

案漢志海中星占驗十二卷隋志微星之數蓋萬一
千五百二十庶物蠢蠢隋志引咸得繫命不然何以
摠而理諸夫三光同形有似珠玉神守精存麗其職
而宣其明及其衰神歇精斃於是乎有隕星然則奔
星之所墜至地則石文曜麗乎天其動者七日月五
星是也周旋右回天道者貴順也近天則遲遠天則
速行則屈屈則留回留回則逆逆則遲迫於天也行
遲者觀於東觀於東屬陽行速者觀於西觀於西屬
陰日與月共配合也攝提案石氏曰歲星一名熒惑
地候案石氏曰填星一名見晨附於日也太白辰星
見昏附於月也二陰三陽參天兩地故男女取則焉

方星巡鎮必因常度苟或盈縮不逾於次故有列司
作使曰老子四星周伯王逢芮各一錯乎五緯之間
其見無期其行無度實妖經星之所然後吉凶宣周
其祥可盡此文依開元占經更正舛誤

失父零丁

漢戴良

敬白諸君行路者敢告重罪自為禍積惡致災天困
我今月七日失阿爹念此酷毒可痛傷當以重贈用
相償請為諸君說事狀我父軀體與眾異脊背偃僕
捲如裁唇吻參差不相值此其庶形何能備請復重
陳其面目鴟頭鵠頸獾狗案此下脫眼淚鼻涕相迫
逐吻中含納無齒牙食不能嚼左右蹉似西域駱駝

案此句當有請復重陳其形骸為人雖長甚細材面
脫字未詳
目芒蒼如死灰眼眶白陷如羹楮此文恐未全存之
案御覽云戴良字文讓而後漢書獨行傳之戴
裏字叔鸞未知其爲一人與否姑附出於此

非草書

余郡士有梁孔達姜孟穎者皆當世之彥哲也然慕
張生之草書過於希顏焉孔達寫書以示孟穎皆口
誦其文楷其篇無怠倦焉於是後生之徒競慕二賢
守令作篇人撰一卷以爲祕玩余懼其背彼趨此非
所以宏道興世也又想羅趙之所見蚩涓故爲說草
書本末以慰羅趙息梁姜焉竊覽有道張君所與朱
使君書稱正氣可以消邪人無其費妖不自作誠可

謂信道抱真知命樂天者若夫褒杜崔沮羅趙所
有自臧之意者無乃近於矜伎賤彼貴我哉夫草書
之興也其於近古乎上非天象所垂下非河洛所吐
中非聖人所造蓋秦之末刑峻網密官書煩冗戰攻
並作軍書交馳羽檄分飛故爲隸草趣急速耳示簡
易之旨非聖人之業也但貴刪難省煩損複爲單務
取易爲易知非常儀也故其讚曰臨事從宜而今之
學草者不思其簡易之旨以爲杜崔之法龜蛇所見
也其撥扶枯屈皆天乙○案二音舊不可失也齟齬
以上苟任涉學皆廢倉頡史籀競以杜崔爲楷私書
相與猶謂就書適迫遽故不及草草木易而速今反

以難而遲失指多矣凡人各殊氣血異筋骨心有疎
密手有巧拙書之好醜在心與手可強為哉若人顏
有美惡豈可學有相若耶昔西施病心捧胃而顰衆
愚效之祇增其醜趙女善舞行步媚蠱學者弗獲失
節匍匐夫杜崔張子皆有超俗絕世之才博學餘暇
遊手於斯後世慕焉專用為務鑽堅仰高忘其罷勞
夕惕不息仄不暇食十日一筆月數丸墨領袖如皂
唇齒常黑雖處衆坐不遑談戲展指畫地以草劇壁
臂穿皮刮指爪摧折見鯁蘇來切○案善脫出血猶
不休輟然其為字無益於工拙亦如効顰者之增醜
學步者之案此六字墨池編脫依太失節也且草書

之人蓋伎藝之細耳鄉邑不以此較能朝廷不以此
科吏博士不以此講試四科不以此求備徵聘不問
此意考績不課此字徒善字既不達於政而拙草亦
無損於治推斯之所言豈不細哉夫務內者必闕外
志小者必忽大俯而捫蠶不暇見天地天地至大而
不見者方銳精於蟣蠶乃不暇焉第以此篇研思銳
精豈若用之彼聖經稽慙協律推步斯程探贖鉤深
幽贊神明覽天地之心推聖人之情折議論之中理
俗儒之諍依正道於雅說濟雅樂於鄭聲興至德之
和睦宏大倫之元清窮可以守身遺名達可以尊主
致平以茲命世永監後生不亦淵乎

譏許由

魏康元

潛居默靜，隱於箕山，身在布衣而輕天下，世人歸其高行，學者以爲美談。夫際會之間，矯時取譽，至乃抽簪散髮，背時逆命，隱於山林之中，以此自高，非以勸智能之士，入通達之教，故譏而責之曰：

太上貴德，其次立功，世殊時異，不得而同。故伯禹過門而不入，稷契刻節而奮庸，股肱帝室，作民王公。今子生聖明之世，得觀雍熙之治，則當攄不朽之功，暢不羈之志，龍飛鳳起，修攝君司，佐天理物，幹成王事。若子以堯爲闇主，則歷代載其功，以民爲貪亂，則比屋可封。若夫世濁時昏，上無賢君，忠臣不出，小人聚

羣，卽當撥煩理亂，跨騰風雲，光顯時主，拔濟生民，何得偃蹇藏影，蔽身夫道，不虛行士，不徒生，生則幹時爲國之楨，故伊尹干湯，周公相成，興治濟世，以致太平。生有顯功，沒有美名，人生於世，貴能立功，何得逃位，矯世絕蹤，丹朱不肖，朝有四凶，堯放求賢，遜位于子，度才處分，不能則已，何所感激，臨河洗耳，山居巢處，執心不情，辭君之祿，忘君之榮，居君之地，避君之庭，立身若此，非子之貞，欲言子智，則不仕聖君，欲言子高，則鳥獸同羣，無功可紀，無事可論。

買冢地蒞

晉楊紹

大男楊紹從土公買冢地一丘，東極闕澤，西極黃滕。

南極山背北極於湖直錢四百萬即日交畢日月爲證四時爲任太康五年九月廿九日對共破荆民有私約如律令

奴券

晉石崇

余元康之際出在滎陽東住聞主人公言聲太粗須與出趣吾車曰公府怪吾家嘵嘵邪中買得一惡紙奴名宜勤身長九尺餘力舉五千斤挽五石力弓百步射錢孔言讀書欲使便病日食三斗米不能奈何吾問公賣不公喜便下絹百疋聞謂吾曰吾胡王子性讀書公府事一不上券則不爲公府作券文曰取東海巨鹽東齊羝羊朝歌蒲薦八板桃牀負之安邑

梨栗之鄉常山細縑趙國之編許昌之總沙房之縣

作車當取高平莢榆之穀無尾髑髏之狀大良白槐

之輻河東茱萸之輞亂節桑轅中脫未詳太山桑光長安

弓材可斫千張山陰青槻烏皞柘桑張金好墨過市

數蠶并市豪筆備郎寫書皞角憤道脫誤未詳金案玉梳

宜勤供筆更作多辭乃斂吾絹而歸此文不全

外他書罕載故錄之

斷酒戒

晉庾闡

蓋神明智惠人之所以靈也好惡情欲人之所以生也明智運於常厓好惡安於自然吾固以窮智之害

性任欲之喪真也。於是椎金罍，碎玉碗，破兕觥，捐觚瓊，遺舉白廢，引滿使巷無行，榼家無停壺，剖樽折杓，沈炭銷鑪，屏神州之竹葉，絕縹膠乎華都，言未及盡，有一醉夫勃然作色曰：益空桑珍味，始於無情，靈和陶醞，竒液特生，聖賢所美，百代同營，故醴泉涌於上，世懸象渙乎列星，斷蛇者以興，霸折獄者以流，聲是以達人暢而不壅，抑其小節而濟大通，子獨區區檢情自封，無或口閉其味而心馳其聰者乎？庾生曰：爾不聞先哲之言乎？人生而靜，天之性也；感物而動，性之欲也；物之感人，無窮而情之好惡，無節，故不見可欲，使心不亂，是以惡迹止步，滅影即陰，形情絕於所

託萬感無累乎心。心靜則樂，非外唱樂足則欲無所淫。唯味作戒，其道彌深。賓曰：唯唯，敬承德音。

弔鶴文

晉湛方生

余以元冬修夜，忽聞階前有孤鶴鳴，遡寒風而清叫，感淒氣而增悲，屬聽未終，余有感焉。乃爲文以弔之。惟海嶠之竒鳥，資秀氣以誕生，疑鸞皇而比翼，超羽族而長靈，濯冰霜之素質，颺九臯之竒聲，啄荒庭之遺粒，漱絕澗之餘清，望雲舒而息翮，仰朝霞而晨征，輟王子之靈轡，繫虞人之長纓，辭丹穴之神友，與雜鷺而同庭，軒天衢而奔想，顧樊籠而心驚，獨中宵而增思，負青霜而夜鳴，資沖天之雋翮，曾不殊於鳥雀。

稟禱壽之修期忽同彫於秋薄匪口物之足悲傷有理而橫落

筆陣圖

衛夫人

若初學書先須大書不得從小善鑿者不寫善寫者不鑿多骨微肉者筋書多肉微骨者墨猪多力豐筋者聖無力無筋者病一二從其消息而用之

鮒表

梁韋琳

臣鮒言伏見除書以臣為粽一日熬將軍油蒸校尉臈州刺史脯脂如故肅承將命含灰屏息憑籠臨鼎載統載惕臣美愧夏鱸味慚冬鯉常懷鮎服之謂每懼鼈巖之譏是以漱流湖底枕石泥中不意高賞殊

私曲蒙鈞拔遂得超升綺席忝預玉盤遠廁玳筵猥頒象箸澤覃紫購恩加黃腹方當鳴姜動椒紆蘇佩儻輕瓢纒動則樞盤如烟濃汁暫停則蘭肴成列宛轉綠壘之中逍送朱唇之內銜恩噬澤九殞弗辭不任屏營之誠謹列銅鎗門奉表以聞
詔荅曰省表具知卿池沼縉紳陂渠俊乂穿蒲入苐肥滑有聞允堪茲選無勞謝也

賜錢武肅王鐵券

唐昭宗

維乾寧四年歲次丁巳八月甲辰朔四日丁未皇帝若曰咨爾鎮海鎮東等軍節度浙江東西等道觀察處置營田招討等使兼兩浙鹽鐵制置發運等使開

續苑二十
府儀同三司檢校太尉兼中書令使持節潤州刺史上柱國彭城郡
王食邑五千戶食實封一百戶錢鏐朕聞銘鄧騰之
勳言垂漢典載孔悝之德事美魯經則知褒德策勳
古今一致頃者董昌僭偽為昏鏡水狂謀惡貫深染
齊人而爾披攘兇渠盪定江表忠以衛社稷惠以福
生靈其機也氛祲清其化也疲羸秦拯於粵於塗炭
之上師無私焉保餘杭成金湯之固政有經矣志獎
王室績冠侯藩溢于旂常流在丹素雖鍾繇刊五熟
之釜竇憲勒燕然之山未足顧輟排錄功抑有異數
是用錫其金版申以誓詞長河有似帶之期泰華有

如拳之日惟我念功之旨永將延祚子孫使卿長襲
寵榮克保富貴卿恕九死子孫三死或犯常刑有司
不得加責承我信誓往唯欽哉宜付史館頒示天下
中書侍郎兼戶部尚書平章事臣崔允宣奉

續古文苑卷第二十

Blank manuscript area with vertical lines.

續古文苑卷第二十

三

